

Sulat I Pablo Tun Ta Mga Taga Roma

Una Basan

Ni libro igpasulat i Pablo para katô mga ágpampamaké na góddô tun ta lunsud ka Roma. Ágpanámdám tô mga katig manubù na igpasulat ni i Pablo róggun igóddô sikandin tun ta lunsud ka Corinto ó Filipos. Si Tercio tô igsulat kani mga kagi i Pablo. Tô igpasulat si Pablo kani libro, ándà pa sikandin sadun tun ta Roma, asal igpasulat din ébô makataganà dan para katô kadungù din. Si Pablo taganà dán igpriso tô ándà pa sadun tun ta Roma. Mabasa ni tun ta libro na igsulat i Lucas, Lumu kapitulo 21 sippang ka kapitulo 28.

Nit libro, igtinurù si Pablo na Batà ka Manama si Jesu-Cristo na Áglangngagán na matulus. (Ahaán tô Roma 1:1-5.)

Igpénagpát din na ikasalà tô langun manubù asta supakan dan ka Manama. Kailangan duwán makatábbus kandan. (Ahaán tô kapitulo 1 bersikulo 18 sippang ka kapitulo 3 bersikulo 20.)

Igtinurù sikandin na mému tanggapan ki ka Manama na nángngà tun ta saruwan din ukit dád katô kapamaké ta ki Jesu-Cristo na igsupakan tingód katô mga salà ta, su igbullas sikandin áknita asta igmatayan sikandin. (Ahaán tô kapitulo 3 bersikulo 21 sippang ka kapitulo 5 bersikulo 21.)

Igtinurù sikandin na mému kadayawan tô Manama ukit dád katô kapóddô ta ki Cristo dini áknita. (Ahaán tô kapitulo 6 sippang ka kapitulo 8.)

Igtinurù pagsik sikandin tingód katô mga gasa na ágbággén katô Ugis Espiritu ka Manama tun ta mga ágpampamaké (12:3-8), asta tingód katô bánnal ginawa tun ta mga kataladi ta. (Ahaán tô kapitulo 12 sippang ka kapitulo 15.)

1 ¹Ni sulat ni tikud dini kanak si Pablo na ágsuguánnán i Jesu-Cristo. Igsalinna ka Manama asta igimuwa ikandin na apostoles na ágtinurù katô Madigár Gulitán din.

²Ni Madigár Gulitán igtandô ka Manama sayyan ukit katô mga propeta din na igsulat katô kagi ka Manama. ³Ni gó tô Madigár Gulitán tingód katô Batà ka Manama na si Jesu-Cristo. Tingód katô kamanubuan din, rubbad sikandin i Harì David sayyan. ⁴Tingód katô

kamanamaan i Jesu-Cristo na Áglangngagán ta, tuu gó igpasóddór ka Manama na Batà din sikandin ukit katò kanté din puman kandin. ⁵Ukit ka kédu asta tabang i Cristo kanak, igimuwa ka Manama na apostoles ébô ukit kanak marapung tô mamaké asta tumuman katò kakalyag i Cristo asta pabantugán sikandin tun ta langun banuwa. ⁶Sikiyu na mga ágpampamaké tun ta Roma tô igsalin ka Manama ébô pasakup kó tun ki Jesu-Cristo.

⁷Ni sulat ni para katò langun yu na mga sakup ka Manama na góddô tun ta lunsud ka Roma. Ágginawaan kó ka Manama, asta igsalin kó ikandin ébô imun kó na mga sakup din.

Mólà pa ka tabangan kó ka Manama na Ámmà ta asta katò Áglangngagán na si Jesu-Cristo, asta bággayan kó ka kasunayan.

Igpasalamat asta igdasal si Pablo

⁸Tô una kagin ku ákniyu, ágpasalamatta tun ta Manama tingód katò iglumu i Jesu-Cristo ákniyu langun, su tô kapamaké yu ki Jesu-Cristo isóddóran katò mga manubù tun ta langun banuwa. ⁹Ágtumanna katò sugù ka Manama kanak tô igtinurù a ka Madigár Gulitán tingód katò Batà din. Isóddóran ka Manama na inalayunna ágdasal tingód ákniyu. ¹⁰Ágpamuyù a tun ta Manama na atin ka mému kandin, makasadunna tun ákniyu. ¹¹Ágpanimólà a gó na kitanán ku sikiyu, su kakalyag ku na makatabangnga ákniyu ébô ukit katò Ugis Espiritu kumabákkár tô kapamaké yu ki Jesu-Cristo. ¹²Kakalyag ku na madunna tun ákniyu ébô pabákkárré ki ka pusung ukit ka kapatóngkóé ta tingód katò kapamaké ta ki Jesus.

¹³Mga kataladi, kakalyag ku na kasóddóran yu na inalayunna ágplano madun tun ákniyu, asal inalayunna ágkadalangan sippang áknganni. Madunna tun ákniyu ébô duwán mapid tun ta kapamaké ki Cristo iring katò inému tun ta mga ánnà Judio na igsadunan ku tun ta дума mga banuwa. ¹⁴Kailangan mulit-ulitta katò Madigár Gulitán tun ta langun na mga ánnà Judio, tun ta mga ikóskuwila ó tun ta ándà, tun ta mga duwán kakatigan ó tun ta ándà kakatigan. ¹⁵Purisu magan tô pusung ku na ulit-ulitan ku pagsik sikiyu asta tô дума mga taga Roma tingód katò Madigár Gulitán.

Tô katulusan katò Madigár Gulitán tingód ki Jesu-Cristo

¹⁶Ándà a duwa-duwa igulit-ulit katò Madigár Gulitán, su tô gó tô katulusan na gamitán ka Manama ébô tábbusán din tô langun mamaké ki Jesu-Cristo. Mga Judio tô una igtábbus, yan pa tô mga ánnà Judio. ¹⁷Ukit kani Madigár Gulitán, ágpasóddór tô Manama na tanggapán din na nángngà tun ta saruwan din tô mga manubù. Tô gó tô lumun din ukit dád katò kapamaké dan, iring katò igsulat sayyan,

“Tò mga tanggapan ka Manama na nangngà tun ta saruwan din ukit katò kapamaké dan, tò gó tò bággayan din ka kantayan na ándà ágtamanán.”^a

Duwán salà ka langun manubù

¹⁸Tò Manama ágpasóddór na ruudan asta supakan din tò langun manubù na di ágpamaké kandin asta áglumu ka madat, su ukit ka madat na áglumun dan, ágdalangan dan tò kasóddóran ka kabánnalan tingód katò Manama. ¹⁹Tò kabánnalan tingód katò Manama ágkasóddóran katò langun manubù, su Manama tò igpasóddór kandan. ²⁰Tikud tun ta kému ka Manama kani banuwa sippang áknganni, ágpasóddór tò Manama tingód katò kamanamaan din, agad di sikandin ágkitanán. Igpasóddór din na matulus sikandin ukit katò langun na iglumu din. Purisu di makakagi tò mga manubù na ándà sóddór dan tingód katò Manama. ²¹Agad isóddóran dan na duwán Manama, asal ándà dan respeto kandin, asta ándà dan pasalamat kandin. Asal igpanámdám dan na ándà ágpulusán dan tun kandin. Purisu ándà dan kagpátti tò kabánnalan. ²²Agad igkagi dan na mapandé dan, asal inému dan baling ágkangulágnulág. ²³Igtayyugan dan tò matulus Manama na di ágkamaté asta igpangadap dan baling tò mga ágmanaman na igimu dan iring na bónnóng katò mga manubù na ágkamaté, mga manuk ta kayun, mga mannap, asta mga áppuy.

²⁴Purisu igpabayà ka Manama sikandan ébò tumanán dan tò kandan madat kakalyag. Purisu madat tò iglumu dan tun ta lawa ka mga unawa dan gamama asta unawa dan gabayi. ²⁵Ándà dan tanggap katò kabánnalan tingód katò Manama, asal igpangadap dan baling ka ánnà bánnal manama. Ándà dan pangadap ka Manama na igimu katò langun, asal igpangadap dan baling tò igimu ka Manama. Mólà pa ka durungán tò Manama ka ándà ágtamanán. Matuman ni!

²⁶Su igtayyug tò mga ánnà Judio ka Manama, igpabayà din sikandan. Purisu tò ágkémun dan, igtuman dan dád katò kakalyag dan na makayayà. Agad tò mga gabayi, igsódò dan áglayuk katò mga duma dan asta áglayuk dan katò unawa dan na mga gabayi. ²⁷Iring pagsik kani tò iglumu katò mga gamama, su igsódò dan áglayuk katò mga gabayi, asta igpamasak dan katò unawa dan na mga gamama ébò lumayuk kandan. Ándà kayyà dan igpamasak ka unawa dan na mga gamama. Su kulang tò panámdám dan tingód katò Manama, igsupakan dan dán katò supak na nangngà gó kandan.

²⁸Su igélléyan dan tò kasóddóran tingód katò Manama, igpabayà ka Manama sikandan ébò kapánnuan dan katò ánnà nangngà panámdám

^a 1:17 Habacuc 2:4

dan. Purisu iglumu dan tô ánnà nángngà tun ta saruwan ka Manama. ²⁹Inalayun dan iglumu ka marapung klasi ka madat. Kakalyag dan na lumumu ka madat tun ta mga duma, angén dan pád tô kaduwánnan ka mga duma, asta gingà dan, ágmaté, ágsamuk, áglimbung, asta ágringasa ka duma mga manubù, ágsarupát, ³⁰ágbuyas, asta madat tô pusung dan tun ta Manama. Magani dan, ágpallayat-layat, asta ágpadadurung. Inalayun dan ágplano ka madat. Dì dan ágbánnal katô ámmà dan asta innà dan. ³¹Ágkatuluan dan. Dì dan ágtuman ka tandô. Ándà palang ágginawaan dan agad mga sakup ka kandan pamilya, asta ándà kédu dan. ³²Agad isóddóran dan na igsugù tô Manama na kailangan matayan tô langun na áglumu ka madat iring kani, asal ágpanayun dan baling áglumu ka madat, asta ágkadigárran dan pagsik katô mga manubù na áglumu ka madat.

Tô supak ka Manama

2 ¹Purisu agad sikiyu, dì kó kaliyasan katô supak ka Manama. Atin ka rumuud kó katô ássa manubù na áglumu ka madat asal áglumu kó pagsik katô madat na magunawa katô áglumun dan, igruudan yu pagsik tô ákniyu sarili. ²Isóddóran ta na nángngà tô karuud ka Manama ka supakan din tô mga manubù na áglumu ka madat. ³Purisu sikuna, atin ka ágbuyas ka katô duma manubù na áglumu ka madat, asta madat pagsik tô áglumun nu, kéman nu ka makaluwà ka tikud tun ta supak ka Manama. ⁴Yaka ágpanámdám na dì ka supakan ka Manama ukit katô kadakállan asta kadalámman ka ginawa din. Iring na ilingawan nu na dakál tô ginawa ka Manama áknikó ébô rumákkád ka. ⁵Asal géllé ka na rumákkád. Purisu tuu pa madat tô supak ka Manama áknikó tun ta tapuri álló ka pasóddórán din na nángngà tô karuud din.

⁶Duwán bággén ka Manama tun ta tagsábbad-sábbad manubù tingód katô mga iglumu dan. ⁷Duwán kantayan na ándà ágtamanán na bággén ka Manama tun ta mga manubù na pakatiis áglumu ka madigár asta malyag na durungán asta pabantugán dan ka Manama asta malyag katô kantayan na ándà ágtamanán. ⁸Asal tô mga manubù na ágtuman ka kakalyag ka kandan pusung, asta dì ágbánnal katô kabánnalan tikud tun ta Manama, asal áglumu dan baling ka madat, tô gó tô tuu supakan ka Manama. ⁹Madat gó tô kahirapan na padungguán ka Manama tun ta langun manubù na áglumu ka madat, tun ta mga Judio na igsalin ka Manama asta tun pagsik ta mga ánnà Judio. ¹⁰Asal duwán durung, bantug asta kasunayan na bággén ka Manama tun ta langun manubù na áglumu ka madigár, tun ta mga Judio na igsalin ka Manama asta tun ta mga ánnà Judio. ¹¹Tô gó tô lumun ka Manama su ka rumuud sikandin, ándà manubù na ágmusingán din agad ándin tô bónnóng dan.

¹²Tô mga ánnà Judio na ándà ikasóddór katô mga sugù i Moises^b sayyan, atin ka iglumu dan ka salà, supakan dan ka Manama tingód katô salà dan. Tô mga Judio na ikasóddór ka mga sugù i Moises, atin ka iglumu dan ka salà, supakan dan ka Manama ukit katô mga sugù i Moises. ¹³Nángngà tô supak ka Manama kandan su ánnà tô mga manubù na ikasóddór dád katô mga sugù tô tanggapán ka Manama na nángngà tun ta saruwan din. Asal tô mga manubù na inalayun ágtuman katô langun sugù tô tanggapán ka Manama na nángngà tun ta saruwan din. ¹⁴Atin ka tô mga ánnà Judio na ándà ikasóddór ka mga sugù i Moises áglumu katô nángngà na magunawa tun ta mga sugù, ágpasóddór dan gó na duwán sugù tun ta panámdám dan, agad ándà dan tinurui tingód katô mga sugù i Moises. ¹⁵Ágpasóddórán dan na duwán sugù tun ta panámdám dan, su isóddóran dan na duwán madigár áglumun asta duwán madat, su duwán timpo na ágpanámdám dan na madigár tô iglumu dan, asta duwán timpo na ágpanámdám dan na madat tô iglumu dan. ¹⁶Dumunggù tô álló na supakan ka Manama tô langun manubù tingód katô igpanámdám asta iglumu dan agad inallás, su papiddán din si Jesu-Cristo ébô rumuud kandan. Tô gó tô Madigár Gulitán na ágtinuruán ku.

Mga Judio asta mga sugù

¹⁷Na, duwán kagin ku tun ta tagsábbad-sábbad mga Judio. Idayawan kó su Judio kó. Ágsarig kó na duwán ágpulusán yu tingód katô mga sugù i Moises. Ágpadadurung kó su igsalin kó ka Manama. ¹⁸Ikasóddór kó ka ándin é kakalyag ka Manama, asta katig kó ágsalin ka ándin é madigár, su igtinuruan kó katô mga sugù i Moises. ¹⁹Ágpanámdám kó na katig kó ágpénagpát katô kabánnalan tingód katô Manama tun ta mga ánnà Judio, su iring kó katô gagak ka mga bólóg. Ágpanámdám kó na katig kó ágtinurù tingód katô Manama tun ta mga ánnà Judio na di pakagpát, su iring kó na sulù na makappawà ka dalan para ka mga ágpanó tun ta kangittángngan. ²⁰Ágpanámdám kó na katig kó tuminurù katô mga ándà ikagpát katô kabánnalan, asta katig kó tuminurù katô mga manubù na mababó pa é isóddóran dan tingód katô Manama su tun dán ákniyu tô mga sugù i Moises na igsulatan katô kabánnalan tingód katô Manama. ²¹Agad duwán ágpulusán yu su mga Judio kó, asal iring na ándà, su agad ágtinurù kó na kailangan tumanán tô mga sugù, asal sikiyu tô di ágtuman kanan. Agad gulit-ulit kó na madat tô ágtakó, asal ágpanakó kó. ²²Agad ágtinurù kó na di mému ka lumibug, asal áglibug kó. Agad

^b 2:12 Manama tô igbággé katô mga sugù ki Moises, asta si Moises tô igbággé katô mga sugù tun ta mga rubbad i Israel. Purisu ágtawarán katô mga rubbad i Israel na mga sugù i Moises.

ágkaringasa kó katô mga ágmanaman, asal ágtakó kó tikud tun ta mga simbaan dan. ²³Agad ágpapadurung kó su duwán mga sugù tun ákniyu, asal ágpayayyaán yu tó Manama su áglapas kó katô mga sugù. ²⁴Sikiyu tó ágkasugatan kani kagi ka Manama na igsulat,

“Tingód katô madat áglumun yu na mga rubbad i Israel, madat tó ágkagin katô mga ánnà rubbad i Israel tingód katô Manama.”^c

²⁵Sikiyu na mga Judio, atin ka tumuman kó katô mga sugù i Moises, duwán gó ágpulusán yu ka igtupuwan^d kó. Asal ka lumapas kó katô mga sugù, ánnà kó nángngà tun ta saruwan ka Manama agad igtupuwan kó, su inému kó iring katô ándà katupuwi. ²⁶Tô mga ánnà Judio, atin ka ágtuman dan katô mga sugù, nángngà dan tun ta saruwan ka Manama agad ándà dan katupuwi. ²⁷Tô mga ánnà Judio na ágtuman katô mga sugù agad ándà dan katupuwi tikud tun ta kapamasusu dan, makakagi dan na nángngà tó supak ka Manama ákniyu na áglapas katô mga sugù, agad duwán kagi ka Manama tun ákniyu asta igtupuwan kó.

²⁸Ánnà bánnal Judio tó mga ágtuman katô mga ágkémun ka Judio ébô pasóddór na isakup dan tun ta Manama. Asta ánnà nángngà tun ta saruwan ka Manama tó mga manubù na igtupuwan dád, ²⁹su tó bánnal Judio, tó dád gó tó inému na mantu é kantayan ánnà ukit katô katuman katô mga sugù i Moises, asal ukit katô Ugis Espiritu. Tó inému na mantu é kantayan, tó dád gó tó nángngà tun ta saruwan ka Manama. Agad di dan durungán ka duma manubù, asal durungán dan ka Manama.

3 ¹Na, duwán basi ágpanámdám iring kani, “Atin ka di tanggapán ka Manama tó mga Judio ukit ka katupu kandan, ándà dán ágpulusán dan ka tandingán katô mga ánnà Judio, su ándà dán lagà katô katupu.”

²Asal tó taba ku na marapung tó ágpulusán katô mga Judio. Tó una katô langun, tó áknita mga kamónaan tó igsarigan ka Manama katô kagi din.

³Na, duwán basi minsà iring kani, “Su marapung tó mga Judio na ándà tuman katô igtandô dan tun ta Manama, di tumuman tó Manama katô igtandô din katô mga Judio?” ⁴Tó taba ku na ánnà yan! Agad bulalón tó langun manubù, asal inalayun ágtuman tó Manama katô mga tandô din. Duwán igsulat i Harì David sayyan tingód katô supak ka Manama kandin tingód katô salà din, na mà din,

“Manama, atin ka maminág tó mga manubù katô kagi nu tingód katô salà dan, makasóddór dan na nángngà tó langun katô áglumun nu.

Atin ka duwán manubù na dumimanda tingód áknikó, sikuna tó manalu kandan.”^e

^c 2:24 Isaias 52:5 ^d 2:25 Tó ikawala álló pángnga ka kapamasusu, ágtupuwan tó mga gamama ka Judio su tó gó tó pató na isakup dan ka Manama asta ágtumanán dan tó mga sugù din. ^e 3:4 Salmo 51:4

⁵Purisu duwán basì kumagi iring kani, “Atin ka ukít ka kalumu ta ka madat, pasóddórán na nángngà tò áglumun ka Manama, madigár ni. Purisu dì mému ka supakan kí ka Manama.” Tò gó basì tò panámdám ka manubù. ⁶Asal dì gó mému ka kumagi kí na madat tò Manama ka supakan kí na mga Judío! su atin ka dì ruudan ka Manama tò mga Judío, dì mému ka sikandin tò rumuud ka duma mga manubù nit banuwa.

⁷Asal duwán basì kumagi na, “Atin ka ukít ka kélé ku katò mga tandò, ágkasóddórán na nángngà tò áglumun ka Manama, madurung sikandin. Purisu dì mému ka supakanna ikandin tingód katò salà ku.”

⁸Atin ka bánnal ni, madigár ka lumumu kí ka madat ébò madigár tò dungguán. Duwán mga manubù na ágbuyas kanak su kéman dan ka tò gó tò ágtinuruán ku. Asal nángngà ka supakan ka Manama tò ágkagi iring kani.

Masalà-salà tò langun manubù

⁹Purisu dì mému ka manámdám kí na tuu pa madigár tò ágpulusán ka mga Judío ka tandingán katò mga ánnà Judío, su taganá a igkagi ákniyu na supakan ka Manama tò langun masalà-salà, agad Judío ó ánnà Judío.

¹⁰Mà katò kagi ka Manama na igsulat,

“Ándà palang manubù na ándà salà, agad sábbad.

¹¹Ándà palang manubù na ikagpát ka kabánnalan tingód katò Manama,

Asta ándà palang malyag na makasóddór kandin.

¹²Tò langun igsuwé tikud tun ta Manama

Asta inému dan na ándà ágpulusán tun ta Manama.

Ándà palang manubù na ándà salà, agad sábbad.”^f

¹³“Madat tò ágkagin dan iring na kamawù ka igpókéan lábbáng.

Ukít ka ágkagin dan áglimbung dan ka duma mga manubù.

Atin ka ágkagi dan, tò dilà dan iring na aras ka áppuy.”^g

¹⁴“Inalayun dan ágtulád asta ágbuyas.”^h

¹⁵“Agad délák dád tò gunayan dan, ágmaté dan.

¹⁶Agad ánda é ágsadunan dan, duwán ágdadattan dan, asta ágbággé dan ka kahirapan.

¹⁷Ándà isóddórán dan tingód katò kapókit ka kasunayan.”ⁱ

¹⁸“Ándà gó máddang dan katò Manama.”^j

¹⁹Isóddórán ta na mga Judío na ágtuman pád katò mga sugù tò igsulatan tingód kani. Purisu ándà palang makakagi na dì kí supakan, su tò langun ta tò iglumu katò salà na supakan ka Manama. ²⁰Ánnà ukít ka katuman katò mga sugù tò katanggap ka Manama áknita na nángngà tun

^f 3:12 Salmo 14:1-3; 53:1-3 ^g 3:13 Salmo 5:9; 140:3 ^h 3:14 Salmo 10:7

ⁱ 3:17 Isaias 59:7-8 ^j 3:18 Salmo 36:1

ta saruwan din, su dì ki makatuman katô mga sugù. Ukit katô mga sugù kasóddóran ta na masalà-salà ki gó.

Tanggapán ki ka Manama ukit ka kapamaké

²¹Asal áknganni ánnà ukit ka katuman ta katô mga sugù tó katanggap ka Manama áknita na nángngà tun ta saruwan din, su igpasóddór dán ka Manama áknita na duwán dán mantu kapókit na igimu din. Mabasa ni kapókit tun ta kagi ka Manama na igsulat i Moises asta igsulat katô duma mga propeta ka Manama. ²²Tanggapán tó mga manubù ka Manama na nángngà tun ta saruwan din ukit katô kapamaké dan ki Jesu-Cristo. Tó langun manubù na mamaké ki Cristo agad Judio ó ánnà Judio, tó gó tó tanggapán ka Manama na nángngà tun ta saruwan din, su ándà kassaan katô mga manubù tun ta saruwan ka Manama. ²³Tó langun manubù ikasalà. Ándà gó palang manubù na ikatuman katô kakalyag ka Manama. ²⁴Asal ukit katô kédu ka Manama, igtanggap sikandin katô manubù na nángngà tun ta saruwan din. Tó gó tó gasa na igbággé din tó igtábbus ki ikandin ukit ki Jesu-Cristo. ²⁵Igpasóddór ka Manama na si Jesu-Cristo tó ágpasinsiya katô mga salà ta ukit katô dipanug din tó inaté sikandin tun ta krus. Igpasinsiyaan ki ka Manama ukit katô kapamaké ta ki Cristo ébô pasóddórán ka Manama na tanggapán din tó mga manubù. Tó ándà pa kamaté si Cristo, ándà kasóddóri ka nángngà tó supak ka Manama katô mga masalà-salà, su ukit katô kallayat ka ginawa din, ándà din supaki tó iglumu ka salà dángngan. ²⁶Asal áknganni igpasóddór din na nángngà tó langun ka áglumun din, asta ágpasóddórán din na ándà dán salà katô manubù na ágpamaké ki Jesus.

²⁷Purisu dì mému ka padadurung ki, su dì ki makakagi na ukit katô katuman ta katô mga sugù tó katanggap ka Manama áknita na nángngà tun ta saruwan din, su ukit dád katô kapamaké ta ki Cristo tó katanggap ka Manama áknita na nángngà tun ta saruwan din. ²⁸Dì ki padadurung su isóddóran ta na igtanggap ki ka Manama na nángngà tun ta saruwan din ukit katô kapamaké ta ki Cristo. Ánnà ukit katô katuman ta katô mga sugù, su dì ki gó pakatuman kani. ²⁹Sikiyu na mga Judio, yakó ágpanámdám na sikiyu dád tó mému pasakup tun ta Manama, su mému pagsik pasakup tó mga ánnà Judio. ³⁰Sábbad dád tó Manama, asta sikandin tó tumanggap katô mga Judio na nángngà tun ta saruwan din ukit katô kapamaké dan ki Cristo. Iring kanan, tumanggap sikandin katô mga ánnà Judio na nángngà tun ta saruwan din ukit katô kapamaké dan. ³¹Purisu tingód katô mga sugù i Moises, yakó ágpanámdám na ándà dán ágpulusán kani! su ukit katô kapamaké ta ki Cristo tó katanggap ka Manama áknita na nángngà tun ta saruwan din. Asal ukit ka kapamaké ta, igmasarig baling tó mga sugù.

Itanggap si Abraham su igpamaké sikandin

4 ¹Na, panámdám kó tingód katô inému ki Abraham na kamónaan katô langun ta na mga Judio. ²Atin ka ukit katô madigár iglumu i

Abraham tô katanggap ka Manama kandin na nángngà tun ta saruwan din, mému ka padadurung si Abraham. Asal ánnà ukit katô iglumu i Abraham tô katanggap ka Manama kandin na nángngà tun ta saruwan din. ³Isóddóran ta ni su mà katô kagi ka Manama na igsulat,

“Igpamaké si Abraham katô Manama.

Purisu igtanggap tô Manama ki Abraham na nángngà tun ta saruwan din.”^k

⁴Atin ka lumumu tô manubù, ánnà gasa tô bággén kandin, asal tandan ukit katô pagud din. ⁵Tô manubù na mamaké katô Manama na ágtanggap katô mga masalà-salà, tô gó tô tanggapán katô Manama na nángngà tun ta saruwan din ukit ka kapamaké katô manubù, ánnà ukit katô pagud din. ⁶Iring kani tô igkagi i Hari David sayyan na kadayawan tô mga manubù na tanggapán ka Manama na nángngà tun ta saruwan din ánnà ukit katô pagud dan asal ukit katô kapamaké dan, su igkagi sikandin, na mà din,

⁷“Ágkadayawan tô mga manubù na igpasinsiyaan tingód katô kalapas dan ka mga sugù,

Asta tingód katô kalumu dan ka madat na igtambunan ka Manama.

⁸Ágkadayawan tô manubù na ándà dán panámdámme ka Manama tô mga salà din.”^l

⁹Na, tô kadayawan ta tingód katô katanggap ka Manama na ándà salà ánnà dád para áknita na mga Judio na igtupuwan, asal para pagsik katô mga ánnà Judio agad ándà dan tupuwi. Isóddóran tad na igtanggap katô Manama si Abraham na nángngà tun ta saruwan din su igpamaké sikandin.^m ¹⁰Asal kadángngan tô katanggap ka Manama ki Abraham na ándà salà? Pángnga igtupuwan sikandin ébô duwán pató na igpasakup sikandin tun ta Manama, ó tô ándà pa tupuwi? Inému ni tô ándà pa sikandin tupuwi. ¹¹Tô igpamaké dán si Abraham, igkagi tô Manama na kailangan patupu si Abraham, su tô gó tô pató na igtanggap ka Manama sikandin na nángngà tun ta saruwan din ukit katô kapamaké din tô ándà pa sikandin tupuwi. Purisu inému si Abraham na ámmà katô langun ágpamaké agad ándà dan tupuwi, asta igtanggap ka Manama sikandan na nángngà tun ta saruwan din. ¹²Inému pagsik si Abraham na ámmà katô langun na igtupuwan asta igpamaké ka Manama iring katô kapamaké i Abraham tô ándà pa sikandin tupuwi.

Tô manubù na ágpamaké makatanggap katô igtandô

¹³Tô sayyan, igtandô tô Manama ki Abraham asta tun ta mga rubbad din na bággén din kandan tô madigár na igtandô din tun ta langun manubù nit banuwa. Tô gó tô igtandô ki Abraham ánnà su igtuman din

^k 4:3 Genesis 15:6 ^l 4:7-8 Salmo 32:1-2 ^m 4:9 Ahaán tô Genesis 15:6

tô mga sugù, asal igtandô su igpamaké sikandin ka Manama. Purisu igtanggap ka Manama si Abraham na ándà salà tun ta saruwan din. ¹⁴Atin ka tô mga manubù dád na ágtuman ka sugù tô bággayan katô igtandô ka Manama, ándà dán ágpulusán ka kapamaké ta ka Manama, asta di matuman tô igtandô din. ¹⁵Igtandóan si Abraham ánnà ukit katô katuman din ka mga sugù, su supakan ka Manama tô manubù na di pakatuman katô langun sugù din. Atin ka ándà mga sugù, ándà áglapas katô mga sugù.

¹⁶Purisu sikita dád na ágpamaké tô bággayan ka Manama katô igtandô din, su ukit katô kédu ka Manama, ágtanggap sikandin áknita na nángngà tun ta saruwan din. Purisu matuman tô igtandô ka Manama tun ta langun manubù na inému na mga rubbad i Abraham ukit katô kapamaké dan katô Manama iring ki Abraham. Tô gó tô ágbággén ka Manama ánnà dád tun ta mga ágpampamaké na Judio na ágtuman katô mga sugù, asal tun ta mga ánnà Judio na ágpamaké ka Manama iring katô kapamaké i Abraham, su inému si Abraham na ámmà katô langun ta na ágpampamaké. ¹⁷⁻¹⁸Bánnal ni su mà katô kagi ka Manama na igsulat, “Imun ku sikuna na kamónaan ka marapung mga grupo.”ⁿ

Agad iring na di matuman tô igtandô ka Manama na igimanan i Abraham su tugál dán sikandin asta tô sawa din, asal igbánnal sikandin na marapung tô mga rubbad na bággén ka Manama kandin. Manama tô makanté puman ka manubù na inaté, asta ágkagi sikandin tingód katô ándà pa imuwi iring na igimu dán.

Igbánnal si Abraham na mému sikandin kamónaan ka marapung mga grupo, iring katô igtandô ka Manama kandin, na mà din,

“Iring na karapungan katô mga karani tô langun rubbad nu.”^o

¹⁹Isóddóran i Abraham na tugál dán sikandin, asta di dán sikandin makapabatà, su mga sábbad gatus (100) dán tô idad din. Isóddóran din na ándà kinnam batà tô sawa din na si Sara. Agad isóddóran din ni, asal ándà sikandin duwa-duwa tingód ka katumanan katô igtandô ka Manama kandin. ²⁰Ándà sikandin duwa-duwa tingód katô igtandô ka Manama kandin, asal igpabákkár din baling tô kapamaké din ka Manama, asta igpasalamat sikandin tun ta Manama. ²¹Isóddóran din na makému tô Manama tumuman katô igtandô din. ²²Purisu mà katô kagi ka Manama na ukit katô kapamaké din ka Manama, “Igtanggap ka Manama si Abraham na nángngà tun ta saruwan din.”^p

²³Ánnà dád para ki Abraham tô igsulat kagi ka Manama, na, “Igtanggap na nángngà tun ta saruwan din,” ²⁴asal igsulat pagsik ni para áknita ébô kumabákkár tô kapamaké ta na tanggapán ki ka Manama na nángngà tun ta saruwan din. Igsulat ni para áknita na ágpamaké

ⁿ 4:17-18a Genesis 17:5 ^o 4:17-18b Genesis 15:5 ^p 4:22 Ahaán tô Genesis 15:6

ka Manama na iganté puman katô Áglangngagán ta na si Jesus.

²⁵Igmatayan si Jesus tingód katô mga salà ta, asta iganté puman sikandin ébô pasóddórán ka Manama na tanggapán ki ikandin na nángngà tun ta saruwan din.

Kadayawan tō manubù na igpasábbad tun ta Manama

5 ¹Na, su igtanggap kid ka Manama na nángngà tun ta saruwan din ukit katô kapamaké ta, ándà dán sókó ka Manama áknita. Igpasábbadé ki asta tō Manama ukit katô kamatayan katô Áglangngagán ta na si Jesu-Cristo. ²Ukit katô iglumu din isakup kid tun ta mga ágtabangan ka Manama su igpamaké kid ki Cristo. Idayawan kid su gimanan ta tō álló na pabantugán ki duma katô Manama tun ta langit. ³Idayawan ki pagsik dalám katô kahirapan ta, su isóddórán ta na ukit katô mga kahirapan, makatiis ki na mallayat é ginawa ta. ⁴Atin ka makatiis ki na mallayat é ginawa ta, kasóddórán ta na kadayawan tō Manama tingód áknita. Atin ka kadayawan tō Manama tingód áknita, isóddórán ta na matuman tō gimanan ta. ⁵Atin ka manayun ki giman katô katumanan, kasóddórán ta na ò ki makabullug, su igpasóddór dán ka Manama na ágginawaan ki ikandin ukit katô Ugis Espiritu na igbággé din áknita.

⁶Dángngan tō ándà pa ágkémú ta ébô matábbus ki, tō álló na igsalin ka Manama, inaté si Cristo ébô tábbusán ki na mga masalà-salà. ⁷Tagsábbadé dád tō manubù na pamaté para bullas katô duma manubù, agad nángngà tō áglumun din. Asal para katô manubù na madigár é áglumun din, duwán basì manubù na numunug na pamaté para bullas kandin. ⁸Asal igpasóddór ka Manama na dakál tō ginawa din áknita, su dalám katô kósìg ta kandin, inaté si Cristo para bullas áknita. ⁹Purisu su igtanggap kid ka Manama na nángngà tun ta saruwan din ukit katô dipanug i Cristo na inaté tun ta krus, isóddórán ta na paluwaán ki gó pagsik tikud tun ta supak tun ta tapuri álló. ¹⁰Dángngan mga usig ki katô Manama, asal ukit katô kamatayan katô Batà din, igpagsábbad kid tun ta Manama. Na, su tō gó tō igimu din para áknita, isóddórán ta na tábbusán ki i Cristo ukit katô kantayan din. ¹¹Duwán pagsik kadayawan ta tingód katô iglumu ka Manama áknita ukit ka kamatayan katô Áglangngagán ta na si Jesu-Cristo asta kapasábbad din áknita tun ta Manama.

Si Adan asta si Jesu-Cristo

¹²Masalà-salà ki langun su tō una manubù na si Adan iglumu ka salà. Inaté sikandin tingód katô salà din. Purisu ágkamaté tō langun manubù, su tō iglumu si Adan ka salà, iring na langun manubù tō iglumu ka salà. ¹³Tō ándà pa bággéyi ka Manama tō mga sugù ki Moises, taganà gó iglumu tō mga manubù ka salà, asal tō salà dan ánnà ukit katô kalapas ka

sugù, su ándà pa sugù. ¹⁴Asal isóddóran ta na tikud tun ki Adan sippang tun ki Moises, inaté tô langun manubù su tô langun dan iglumu ka salà. Inaté tô mga manubù agad tô salà dan ánnà iring katô salà i Adan.

Duwán igtanggap katô langun manubù ukit katô iglumu i Adan, asta duwán igtanggap katô langun manubù ukit katô iglumu i Cristo agad tô ándà pa sikandin dunggù. ¹⁵Asal ánnà magunawa tô gasa na igpulus ta ukit katô katanggap ka Manama na nángngà tun ta saruwan din asta tô igpulus ta ukit katô kalumu i Adan ka salà. Agad isóddóran ta na ágkamaté tô langun manubù ukit katô salà i Adan, asal tuu pa bánnal na marapung tô mga manubù na igdungguan katô kédu ka Manama asta igtanggap din na nángngà tun ta saruwan din ukit katô iglumu i Jesu-Cristo. ¹⁶Duwán pa duma kasaan. Su duwán salà katô sábbad dád manubù na si Adan, igkagi tô Manama na kailangan supakan tô langun manubù. Asal su duwán salà katô marapung manubù, duwán kédu ka Manama áknita, asta igtanggap ki ikandin na nángngà tun ta saruwan din. ¹⁷Ukit ka iglumu katô sábbad manubù na si Adan, ágkamaté tô langun manubù. Asal tô mga manubù na tumanggap katô kédu ka Manama asta tanggapán dan ka Manama na nángngà tun ta saruwan din, tô gó tô mangulu duma ki Cristo ka móddô dan duma kandin tun ta langit. Tô gó tô gasa na ágpulusán dan ukit ka iglumu katô sábbad manubù na si Jesu-Cristo.

¹⁸Purisu ukit katô sábbad salà i Adan, kailangan supakan tô langun manubù. Asal ukit katô nángngà lumu i Jesus tun ta krus, duwán kantayan na mému bággén ka Manama tun ta langun manubù asta tanggapán dan ikandin na nángngà tun ta saruwan din. ¹⁹Si Adan tô sábbad na ándà bánnal ka Manama, asta inému masalà-salà tô langun manubù. Iring kani, si Jesus tô sábbad na igbánnal ka Manama, asta marapung tô mga tanggapán ka Manama na nángngà tun ta saruwan din.

²⁰Igbággé ka Manama tô mga sugù ki Moises ébô kasóddóran ta na tuu dakál tô salà ta. Agad dakál tô salà ta, asal tuu pa dakál tô kédu ka Manama áknita. ²¹Agad tô langun manubù ágkamaté ukit katô salà, asal tô langun manubù mému dungguan katô kédu ka Manama su tanggapán dan ikandin na nángngà tun ta saruwan din. Bággayan dan pagsik ikandin ka kantayan na ándà ágtamanán ukit ka iglumu katô Áglangngagán ta na si Jesu-Cristo.

Inaté ki asta inaté kid puman duma ki Cristo

6 ¹Na, su duwán kédu ka Manama áknita, duwán basì manámdám na madigár ka manayun ki lumumu ka salà ébô dakál pa tô kédu ka Manama áknita. ²Asal dì mému! Dì mému ka manayun ki lumumu ka salà, su inéring kid katô inaté manubù na dì dán ágkapiirit lumumu ka salà. ³Panámdám yu ni. Tô igpabunyag ki tingód katô kapasakup ta tun

ki Jesu-Cristo, igpasóddór ki na iring na inaté ki duma kandin. ⁴Purisu tō igpabunyag ki, iring na iglábbáng kid duma kandin ébō ò ki mapirit lumumu ka salà iring na inaté manubù na ò dán ágkapirit lumumu ka salà. Tō igpabunyag ki, iring na inaté kid puman duma kandin ébō duwán mantu kantayan ta, iring katō kanté puman ki Cristo ukit ka katulusan katō Ámmà din na Manama.

⁵Na, su ò ki kid mapirit lumumu ka salà ukit katō kasábbad ta tun ta kamatayan i Cristo, mantu dán pagsik tō kantayan ta ukit katō kasábbad ta tun ta kanté puman ki Cristo. ⁶Kailangan ò ki malingó na tō igpansalan si Jesus tun ta krus ébō maté, iring na igpansalan tun ta krus tō tapé kamanubuan ta na masalà-salà ébō dadattan tō madat kakalyag ka lawa ta, asta ébō ò ki mallang ka salà. ⁷Igpaluwà kid ébō ò ki mapirit lumumu ka salà, iring katō inaté manubù. ⁸Su iring na inaté kid duma ki Cristo, isóddóran ta na igbággayan kid pagsik ka kantayan na ándà ágtamanán iring katō kandin.

⁹Isóddóran tad na inaté puman si Cristo, asta ò dán sikandin maté puman. Ò dán makawid tō kamatayan kandin. ¹⁰Makasábbad dád inaté sikandin ébō talun din tō salà. Asta tingód katō kanté din puman, manté dán sikandin ébō pabantugán din tō Manama. ¹¹Iring kani, kailangan panámdámán yu pagsik na ò kó ágkapid ka madat kakalyag, iring na inaté manubù na ò dán ágkapid ka agad ándin. Mantu dán tō kantayan yu su igpasábbad kó tun ki Jesu-Cristo ébō pabantugán yu tō Manama.

¹²Purisu yakó yu ágpapanguluwi tō salà tun ta lawa yu na ágkamaté ébō ò kó mapirit tumuman katō masalà-salà kakalyag yu. ¹³Yakó ággamit katō lawa yu ébō lumumu ka salà. Asal bággé yu tō sarili yu tun ta Manama ébō imun kó na mga manubù na inaté dángngan asal manté kó puman. Bággé yu tō tibuk lawa yu tun ta Manama ébō gamitán din ukit katō nángngà lumu yu tun ta saruwan din. ¹⁴Tō masalà-salà kakalyag yu ò makapid ákniyu, su ándà dán kailangan ka katuman yu katō mga sugù i Moises. Asal gagakán kó ka Manama na ágkédúwan asta ágtabang ákniyu ébō ò kó lumumu ka salà.

Kailangan nángngà tō áglumun ta tun ta saruwan ka Manama

¹⁵Na, su igtanggap ki ka Manama ánnà ukit ka katuman ta katō mga sugù i Moises, asal ukit ka kedu asta tabang ka Manama, duwán basì manámdám na mému dán ka lumumu ki ka salà. Asal tō taba ku, ò gó mému! ¹⁶Panámdám kó tingód kani. Atin ka pasakup kó tun ta duma manubù ébō mánnal kó kandin iring na állang, mému kó állang katō ágbánnalán yu. Kailangan tumanán ka állang tō sugù katō amo din. Iring kani, atin ka sumalin kó na tumuman ka madat mga kakalyag yu, diyaan kó ka Manama ka ándà ágtamanán. Asal ka sumalin kó na mánnal ka Manama, ò kó áglumu ka salà. ¹⁷Dángngan, iring kó na mga

állang su igtuman kó katô madat mga kakalyag yu. Asal ágpasalamatta tun ta Manama su igtigkané kó igbánnal katô kabánnalan, asta igtuman kó katô igtinurù ákniyu. ¹⁸Igpaluwà kód ka Manama ébô dì kó ágkapirit lumumu ka salà. Inému kód iring na mga állang ka Manama su kailangan ándà salà na áglumun yu. ¹⁹Igsulat ku tingód katô állang su mahirap tó kénagpát yu kani kabánnalan. Dángngan igtuman kó katô madat mga kakalyag yu, su tó panámdám yu tó igpirit katô lawa yu ébô lumumu kó katô dì nángngà, iring katô állang na ágtuman ka sugù katô amo din. Purisu igrayan kó iglumu ka salà. Asal áknganni, kailangan bággén yu tó lawa yu tun ta Manama ébô ándà salà na ágkalumu yu su iglinisan kód ka Manama.

²⁰Dángngan, iring kó na állang su ipirit kó igtuman ka madat kakalyag yu, asta ándà panámdám yu na kailangan lumun yu tó nángngà tun ta saruwan ka Manama. ²¹Ándà madigár na igpulus yu ukit katô kalumu yu katô madat na ágkayyaan yud áknganni, su tó lumumu ka madat iring kani, tó dungguán dan kamatayan.^q ²²Asal igpaluwà kód ka Manama ébô dì kó ágkapirit lumumu ka salà, asta inému kó iring na mga állang ka Manama. Purisu iglinisan kód ka Manama, asta igbággayan kód ka kantayan na ándà ágtamanán. ²³Tô tandan na matanggap katô mga áglumu ka salà tó kamatayan. Asal tó gasa na bággén ka Manama tó kantayan na ándà ágtamanán ukit ki Jesu-Cristo na Áglangngagán ta.

Dì ki mapirit tumuman katô mga sugù

7 ¹Mga kataladi, ikasóddór kó tingód katô mga sugù. Purisu isóddóran yu na kailangan mánnal tó manubù katô mga sugù róggun na manté pa sikandin. Atin ka maté tó manubù, dì mapirit mánnal. ²Iring na bayi na duwán дума, kailangan pasábbadé dan róggun manté dan pa. Asal ka maté tó mama, dì mapirit tó bayi balu tumuman katô sugù tingód katô taladuma. ³Purisu ka lumayuk tó bayi tun ta ássa mama tó ándà pa kamaté tó дума din, makalibug sikandin. Asal ka inaté dán tó дума din, dì mapirit tó bayi balu tumuman katô sugù tingód katô taladuma. Atin ka kumalyag puman tó bayi balu, dì sikandin makalibug katô una дума din.

⁴Mga kataladi, iring ki na inaté manubù na dì mapirit tumuman katô mga sugù. Tó inaté si Cristo tun ta krus, iring na inaté ki дума kandin. Purisu igpasakup ki tun ta ássa, asta iring ki katô bayi na inatayan ka дума din asta igkalyag ka ássa mama. Sikita tó mga sakup i Cristo na iganté puman ka Manama ébô ándà salà na áglumun ta asta ébô durungán tó Manama. ⁵Dángngan, róggun na igtuman ki katô áknita kakalyag, igkinnaman ki katô madat kakalyag ta ukit katô mga sugù. Purisu igdiyaan ki ka Manama, su inalayun ki iglumu ka salà. ⁶Asal su

^q 6:21 Kamatayan, ó supakan ka Manama ka ándà ágtamanán.

iring na inaté kid, dì ki mapirit tumuman katô mga sugù su igpaluwà kid ka Manama tikud tun ta kallang áknita. Dángngan tô igsarig ki katô mga sugù i Moises, ándà ki ikatuman katô kakalyag ka Manama. Asal áknganni, makému kid tumuman katô kakalyag ka Manama su ágtabang tô Ugis Espiritu áknita.

Tô ágpulusán ka mga sugù

⁷Na, duwán basì manámdám iring kani. Atin ka mga sugù i Moises tô makadadat áknita, madat basì tô mga sugù. Asal tô taba ku na ánnà madat tô mga sugù agad makadadat áknita! su ukit dád katô mga sugù, isóddóran ku na masalà-salà a. Na, isóddóran ku na salà tô sabù su mà katô igsulat tun ta mga sugù i Moises, “Yakó ágkasabuan.”^r ⁸Asal ukit katô sugù, inapidda katô madat kakalyag ku asta marapung tô mga isabuan ku. Atin ka ándà palang sugù tingód katô salà, dì ki ágkapid ka kakalyag ébô lumumu ka salà. ⁹Dángngan ándà ku kasóddóri ka ándin tô ágkailanganán ébô makatumanna katô mga sugù. Asal tô isóddóran ku na duwán sugù, “Yakó ágkasabuan,” isóddóran ku na iglumuwa ka salà asta isóddóran ku na ágpiddánna tun ta kamatayan. ¹⁰Kéman ku ka mugtukka tun ta Manama ukit katô katuman ku katô mga sugù. Asal ukit katô sugù, isóddóran ku na ágpiddánna tun ta kamatayan. ¹¹Iglimbunganna katô madat kakalyag ku, su agad madigár pád tô gimanan ku ukit katô katuman ku ka mga sugù, asal ukit katô madat kakalyag ku, ágpiddánna tun ta kamatayan.

¹²Purisu nángngà tô mga sugù na igbággé ka Manama ki Moises. Ugis, nángngà asta madigár tô langun sugù.

¹³Na, duwán basì minsà na manan ka ágpiddán ki tun ta kamatayan ukit katô sugù na madigár? Tumaba a na ánnà! Iglumuwa ka salà ukit katô kakalyag ku na lumumu ka salà. Iggamit tô madigár sugù ébô kasóddóran ku na ágpiddánna tun ta kamatayan asta madat tô áglumun ku. Ukit katô kalapas ku katô sugù, isóddóran kud na tuu madat tô salà.

Tô duwa kakalyag

¹⁴Isóddóran ta na tikud tun ta Ugis Espiritu tô mga sugù i Moises. Asal ágkapidda katô madat kakalyag ku. Iring na inallangnga tun ta madat kakalyag ku. ¹⁵Duwán timpo na dì ku ágkagpáttan tô áglumun ku, su tô madigár kakalyag ku na lumun ku pád, dì ku baling ágkatuman. Asta tô madat na dì ku pád lumun, tô gó baling tô ágkatuman ku. ¹⁶Agad ándà kakalyag ku na lumumuwa ka madat na áglumun ku, asal tô gó tô pató na isóddóran ku na madigár tô mga sugù. ¹⁷Purisu ánnà sakán tô ágsalin katô madat na áglumun ku, asal áglumuwa ka madat su ágpiddánna katô

^r 7:7 Exodo 20:17

salà dini kanak. ¹⁸Isóddóran ku na ándà palang madigár dini kanak, su agad duwán kakalyag ku na lumumuwa ka madigár, asal di ku ágkalumu. ¹⁹Tô madigár na kakalyag ku pád lumun, di ku ágkalumu, asal tô madat na ánnà kakalyag ku lumun, tô gó baling tô ágkalumu ku. ²⁰Purisu su áglumun ku tô madat na di ku pád lumun, isóddóran ku na ánnà tikud tun ta kasalin ku, asal madat baling tô áglumun ku su ágpiddánna katô salà dini kanak.

²¹Isóddóran ku na ni gó tô inalayun ágkalumu. Atin ka kakalyag ku na lumumuwa ka madigár, ágdalanganna katô kanak madat kakalyag. ²²Tun ta kadalámman ka pusung ku, ágkadayawanna tingód katô mga sugù. ²³Asal isóddóran ku na duwán ássa kakalyag dini dalám ka lawa ku. Iring na ágpagawé tô kakalyag ka lawa ku asta tô kakalyag na ágsalinán ku tun ta panámdám ku. Purisu ágkapidda katô salà. ²⁴Tuu madat tô ágriyun ku tingód kani! Mólà pa pád ka duwán makapaluwà kanak tikud tun ta kakalyag katô salà dini ta lawa ku na ágpíd kanak tun ta kamatayan. ²⁵Ágpasalamatta tun ta Manama su ukit katô Áglangngagán ta na si Jesu-Cristo, duwán kaluwaan ta tikud tun ta kakalyag katô salà dini ta lawa ta!

Purisu tun ta panámdám ta duwán kakalyag ta na tumanán tô mga sugù, asal ágkapid ki katô madat kakalyag ta na masalà-salà.

Tô ágkapánnuan ka kakalyag katô Ugis Espiritu

8 ¹Su igtanggap dán tô Manama áknita na nángngà tun ta saruwan din ukit katô iglumu i Cristo para áknita, di gó supakan ka Manama tô mga igpasakup tun ki Jesu-Cristo. ²Duwán mantu kantayan na igbággé katô Ugis Espiritu áknita, asta ukit ki Jesu-Cristo duwán dán mantu kókitan na igimu din ébô paluwaán ki tikud tun ta ágpírit áknita na lumumu ka salà na ágpíd áknita tun ta kamatayan. ³Ándà ki ikatuman katô mga igsugù i Moises su mabákkár tô kakalyag ta na lumumu ka salà. Asal tô ándà ta kagaga, tô gó tô igaga katô Manama. Igpapíd din tô kandin Batà na duwán lawa din iring kani lawa na masalà-salà, ébô tumábbus áknita tikud tun ta salà. Igsupakan ka Manama tô Batà din na igbullas áknita na masalà-salà ⁴ébô makatuman kid katô langun sugù ánnà ukit katô katuman ta katô madat kakalyag ta, asal ukit katô katuman ta katô kakalyag ka Ugis Espiritu. ⁵Tô mga ágtuman ka madat kakalyag dan, tô gó tô ágpanámdám asta ágnunug ka kandan kakalyag. Asal tô mga ágtuman ka kakalyag katô Ugis Espiritu, tô gó tô ágpanámdám asta ágnunug ka kakalyag katô Ugis Espiritu. ⁶Tô mga ágkapánnuan ka madat kakalyag dan, tô gó tô mapíd tun ta kamatayan. Asal tô mga ágkapánnuan ka kakalyag katô Ugis Espiritu, tô gó tô mugtuk tun ta Manama ka ándà ágtamanán asta bággayan ka kasunayan. ⁷Tô mga ágkapánnuan ka madat kakalyag dan, tô gó tô usig ka Manama.

Gélléyan dan tô mga sugù ka Manama, asta dì dan gó pakatuman kani. ⁸Tô mga ágkapid ka madat kakalyag dan, tô gó tô dì makabággé ka dayó tun ta Manama.

⁹Dì kó gó mapirit ágtuman katô madat kakalyag yu, asal mému kó mapid katô Ugis Espiritu su góddô dán tô Ugis Espiritu ka Manama diyan ákniyu. Atin ka duwán manubù na ándà Ugis Espiritu tikud ki Cristo dutun kandin, tô gó tô ánnà sakup i Cristo. ¹⁰Atin ka góddô si Cristo dini áknita, agad maté ni lawa ta tingód ka salà, manté tô espiritu ta,^s su igtanggap tô Manama áknita na nángngà tun ta saruwan din. ¹¹Su góddóan kó gó katô Ugis Espiritu na iganté puman ki Jesus, antén gó puman ka Manama tô ákniyu lawa na ágkamaté. Tô gó tô lumun ka Manama na iganté puman ki Jesu-Cristo, su lumun din ni ukit katô Ugis Espiritu na góddô diyan ákniyu.

¹²Purisu mga kataladi, kailangan tumanán ta tô tinurù katô Ugis Espiritu. Ándà dán kailangan na tumanán ta tô tinurù ka madat kakalyag ta, ¹³su atin ka ágtuman kó ka madat kakalyag yu, mapid kó tun ta kamatayan. Asal ka sumódô kó ágtuman ka madat kakalyag yu ukit katô tabang ka Ugis Espiritu, mugtuk kó tun ta Manama ka ándà ágtamanán.

¹⁴Tô mga ágbánnal katô Ugis Espiritu, tô gó tô mga gabatà ka Manama. ¹⁵Bánnal ni, su igbággayan kó ka Manama katô Ugis Espiritu ánnà ébô kamáddangan kó puman kandin, iring na mga állang na ágkamáddangan katô amo dan, asal igbággayan kó ka Manama katô Ugis Espiritu, asta ukit katô iglumu din, igimu kó ka Manama na mga gabatà din. Ukit katô Ugis Espiritu, makatawar kid katô Manama na Ámmà! ¹⁶Tô Ugis Espiritu ágpasóddór na bánnal tô isóddóran katô espiritu ta na mga gabatà kid ka Manama. ¹⁷Su sikita tô mga gabatà din, bággayan ki katô mga kadigárran ka ándà ágtamanán. Manama tô mággé áknita, asta tô kadigárran na igbággé din ki Cristo, tô gó tô bággén din áknita. Isóddóran ta na bánnal ni su girrayatan ki iring ki Cristo ébô pabantugán ki pagsik duma kandin.

Madigár tô igtaganà áknita

¹⁸Isóddóran ku na tô kahirapan ta áknganni iring na kalingawan ta su tuu madigár tô igtaganà ka Manama áknita na pasóddóran din tun ta tapuri álló. ¹⁹Gangatan katô langun-langun na igimu ka Manama tô dumunggù álló na pakitanán din ka sadan tô bánnal mga gabatà din. ²⁰Tô langun-langun na igimu ka Manama igruudan na ándà ágpulusán ánnà su ándà kakalyag katô langun-langun, asal tô kakalyag ka Manama na duwán pa gimanan, ²¹su dumunggù tô álló na paluwaán ka Manama tô langun-langun tikud tun ta karóddógan ébô bággén din kandan tô

^s 8:10 Manté tô espiritu ta, ó bággén katô Ugis Espiritu tô kantayan áknita.

mabantug kaluwaan na magunawa katô igbággé din áknita na mga gabatà din. ²²Róggun ka ò pa matuman, isóddóran ta na iring na garang tō langun igimu ka Manama nit banuwa sippang áknganni, su gangatan tō katumanan, iring na arangán katô bayi na masig dán mamasusu, su gangatan din tō batà na pamasusun. ²³Ánnà dád mga igimu ka Manama tō garang, asal sikita pagsik garang tun ta pusung ta. Góddóan ki katô Ugis Espiritu na iring na una gasa tingód katô katumanan na gangatan ta. Garang ki tun ta pusung ta róggun na gangat ki katô álló ka katanggap ta katô bággén ka Manama áknita na mga gabatà din. Tō gó tō álló na pamantun ka Manama ni mga lawa ta. ²⁴Tikud tun ta katábbus din áknita, inalayun ki giman katô katumanan. Atin ka ituman dán tō igimanan ta, ándà kailangan na manayun ki giman, su ándà palang manubù na giman katô ituman dán. ²⁵Asal su ándà pa katuman tō gimanan ta, kailangan pallayatán ta tō ginawa ta róggun na gangat ki.

²⁶Tingód katô kalómétan ta, ágtabangan ki katô Ugis Espiritu. Atin ka dumasal ki, ò ki pakasóddór ka ándin tō nángngà pamuyuán ta tun ta Manama. Asal ágpédu-édu tō Ugis Espiritu para áknita tákkás ka arangán din na ò ágkabólós, ²⁷asta isóddóran ka Manama ka ándin tō tun ta pusung ta, asta ágkagpáttan din ka ándin tō kakalyag katô Ugis Espiritu. Isóddóran din na ágdasal tō Ugis Espiritu para áknita na mga sakup ka Manama tingód katô kakalyag din.

²⁸Isóddóran tad na ukit katô langun na ágdunggù áknita, duwán kadigárran na lumun ka Manama para katô langun ta na ágginawa kandin. Tō gó tō lumun din áknita na igsalin din tingód katô kandin kakalyag. ²⁹Tō ándà pa imuwi ni banuwa, taganà isóddóran ka Manama na mamaké ki kandin, asta taganà igsalin pagsik sikandin na imun ki iring na Batà din ébô imun si Cristo na kaké ta na mga gabatà ka Manama. ³⁰Asta tō langun ta na igsalin ka Manama ébô imun ki iring na Batà din, tō gó pagsik tō igtawar din. Asta tō langun ta na igtawar din, tō gó pagsik tō igtanggap din na nángngà tun ta saruwan din. Asta tō langun ta na igtanggap din na nángngà tun ta saruwan din, tō gó pagsik tō bággayan din ka kadigárran na igtaganà din.

Tō ginawa ka Manama áknita

³¹Atin ka manámdám ki tingód katô langun kani na igimu ka Manama para áknita, kasóddóran ta na ándà palang makapanalu áknita su Manama tō ágtabang áknita. ³²Tō kandinnù Batà ándà din awidi, asal igbággé din baling tun ta bállad katô mga manubù na igmaté kandin ébô duwán ágpulusán katô langun ta na mga ágpampamaké. Purisu su igpapid ka Manama si Cristo dini áknita, isóddóran ta na bággén din gó pagsik áknita tō langun na ágkailanganán ta. ³³Ándà palang makakagi na masalà-salà ki na igsalin ka Manama, su Manama gó tō igkagi na ándà

dán salà ta tun ta saruwan din. ³⁴Ándà palang makakagi na kailangan supakan ki su si Jesu-Cristo gó tô taratapid tun ta Manama para áknita. Sikandin tô inaté na igbullas áknita, asta inanté puman, asta igpabantug dán dadan tun ta kawanan katô Manama. ³⁵Isóddóran ta na ándà palang makapadiyà áknita tikud tun ta ginawa i Cristo. Agad kahirapan ki asta samukán ki, agad irrayatan ki, agad ándà makan ta asta kakulangan ki ka umpak, agad limáddangán ki asta matayan ki, asal inalayun gó sikandin ágginawa áknita. ³⁶Duwán igsulat i Hari David sayyan tun ta kagi ka Manama tingód kani mga kahirapan, na mà din,

“Tingód katô kapasakup dé áknikó,
inalayun ágpanámdám tô duma mga manubù na matayan ké.
Panámdám dan na matayan ké
iring dád na mga karnero na giyón.”^t

³⁷Agad ágdungguan ki kani mga kahirapan, asal manalu ki gó ukit ka tabang i Cristo na igginawa áknita. ³⁸⁻³⁹Isóddóran ku gó na agad matayan ki, agad duwán problema ta róggun manté ki pa, agad mga panaligan, agad madat mga espiritu, asal ándà palang makapadiyà áknita tikud tun ta ginawa ka Manama. Agad ándin tô dumunggù áknganni ó tun ta tapuri álló, agad ándin tô duwán katulusan, agad tô tun datas ta langit, agad tô tun dalám ka dagat, agad ándin tô nit banuwa, asal ándà palang makapadiyà áknita tikud tun ta ginawa ka Manama. Igpasóddór tô Manama áknita na tuu dakál tô ginawa din áknita ukit ki Jesu-Cristo na Áglangngagán ta.

Igéléé tô karapungan ka mga Judio ki Cristo

9 ¹Na, bánnal ni kagin ku tun ta saruwan i Cristo. Ánnà bulaló ni kagin ku. Isóddóran ku asta isóddóran katô Ugis Espiritu na bánnal ni. ²Tuuwa iranu tingód katô mga kadumaan ku na rubbad i Israel, asta iring na diya ágkórór. ³Atin ka mému katabangan tô mga kataladi ku na Judio ukit katô supak ka Manama kanak asta padiyaánna ikandin tikud tun ki Cristo, mému kanak ébô matábbus dan. ⁴Sikandan tô mga rubbad i Israel na igsalin ka Manama, asta iring dan na mga gabatà din. Sikandan tô igpakitaan din katô séllaán din, asta sikandan tô igtandóan din ka kadigárran. Sikandan tô igbággayan din ka mga sugù, asta sikandan tô igtinuruan din tingód katô kapangadap kandin. Sikandan tô inalayun igtandóan ka Manama. ⁵Sayyan igsalin ka Manama tô kandan ibantug mga kamónaan na si Abraham, si Isaac asta si Jacob. Asta tô tuu pa madigár, tô mga rubbad i Israel tô igtikudan katô Mesiyas na ipamasusu. Sikandin tô Manama na ágpangulu katô langun. Mólà pa ka durungán sikandin ka ándà ágtamanán. Matuman ni.

^t 8:36 Salmo 44:22

⁶Asal ándà ku kagiyi na ándà tuman tô Manama katô tandô din. Agad marapung tô mga rubbad i Jacob na ánggadanán mga sakup ka banuwa ka Israel, asal ánnà langun dan tô igtanggap ka Manama na kandin mga sakup. ⁷Ánnà su rubbad dan i Abraham tô katanggap ka Manama na mga sakup din, su tagsábbadé dád tun kandan tô igtanggap ka Manama na bánnal mga rubbad i Abraham. Tô gó tô igpasóddór áknita ukit katô igkagi ka Manama ki Abraham, na mà din,

“Ukit katô batà nu na si Isaac bággén ku áknikó tô mga karubbadan na igtandô ku áknikó.”^u

⁸Ukit katô igkagi ka Manama, isóddóran ta na ánnà langun gabatà i Abraham tô tanggapán ka Manama na mga gabatà din, asal tô dád ipamasusu ukit katô tandô din. ⁹Isóddóran yu na ni gó tô igtandô ka Manama ki Abraham, na mà din,

“Tô ámmé na dumunggù, lumónódda dini ákniyu, asta duwán batà mama na pamasusun katô sawa nu na si Sara.”^v

¹⁰Na, ukit katô duwa gabatà i Rebecca asta katô kamónaan ta na si Isaac, duwán igpasóddór ka Manama na ánnà langun rubbad i Abraham tô mému tanggapán din. ¹¹⁻¹²Agad tô ándà pa pamasusuwi si Jacob asta si Esau, agad tô ándà pa iglumu dan na madigár ó madat, taganà igkagi tô Manama tun ta innà dan tingód katô dáppi, na mà din, “Tô kaké batà mému na állang katô adi din.”^w Tô igsalin ka Manama tô adi, igpasóddór din na matuman tô kakalyag ka Manama ánnà ukit katô áglumun ka mga manubù, asal ukit katô Manama na ágsalin kandan. ¹³Bánnal ni su mà katô kagi ka Manama na igsulat katô sábbad propeta, na mà din,

“Igginawaan ku tô adi na si Jacob. Ándà ku ginawayi tô kaké na si Esau.”^x

¹⁴Na, atin ka duwán minsà, “Nángngà tô kasalin ka Manama?” tô taba ku na nángngà gó tô kasalin din! ¹⁵Su igkagi tô Manama ki Moises, na mà din, “Sakán tô sumalin ka sadan tô nángngà tabangan ku.

Sakán tô sumalin ka sadan tô nángngà kéduwan ku.”^y

¹⁶Purisu isóddóran ta na ágsalin tô Manama katô mga manubù na tanggapán din ánnà ukit katô kandan kakalyag ó kandan pagud, asal ukit katô kédu din. ¹⁷Panámdám kó tingód katô igkagi ka Manama tun ta hari ka Ehipto sayyan, na mà din,

“Ándà ku sikuna matayi ébô kitanán yu tô katulusan ku, asta ébô mabantugga tun ta kaluwagan ka banuwa.”^z

¹⁸Purisu isóddóran ta na ágkéduwan tô Manama katô mga manubù ukit katô kandin kakalyag, asta patággasán din tô ulu katô mga manubù ukit katô kandin kakalyag.

^u 9:7 Genesis 21:12 ^v 9:9 Genesis 18:10,14 ^w 9:11-12 Genesis 25:23.

^x 9:13 Malaquias 1:2-3 ^y 9:15 Exodo 33:19 ^z 9:17 Exodo 9:16

¹⁹Na, atin ka duwán minsà, “Atin ka Manama tô ágsalin ka ándin tô lumun ka mga manubù, manan ka supakan ka Manama tô áglumu ka madat? Su ándà palang manubù na makatu katô kakalyag ka Manama.” ²⁰Tumaba a na di mému ka muyas ka katô Manama, su manubù ka dád. Igimu ka katô Manama iring na kudán na gimun ka manubù. Di mému ka muyas tô kudán katô taraimu ukit ka insà din ka manan ka igimu din na iring kanan. ²¹Tô taraimu ka kudán tô mému sumalin ka ándin klasiyi tô kudán na imun din. Mému ka tángngaán din tô sábbad dád palad ka libutà ébô imun din tô sábbad kudán na madigár asta ágdurungán, asta tô sábbad kudán para gamitán dád ka álló-álló.

²²Iring kani tô Manama, su mému ka tumanán din tô kandin kakalyag. Agad duwán kakalyag ka Manama na pasóddórán din na supakan din tô iglumu ka salà, asal igpallayat ka Manama tô kandin ginawa para katô mga iringasaan din asta kailangan supakan. ²³Igpallayat ka Manama tô kandin ginawa ébô pasóddórán din na tuu madigár tô lumun din para katô mga igsalin din ébô duwán kédu din kandan. Tô gó tô taganà mga igsalin din ébô mugtuk dan tun kandin. ²⁴Sikita gó tô mga igsalin din. Ánnà dád tikud tun ta mga Judio tô igsalin din, asal tikud pagsik tun ta mga ánnà Judio. ²⁵Nángngà tô kasalin ka Manama, su tun ta libro na igsulat i Oseas, duwán gó kagi ka Manama tingód kani, na mà din,

“Pasóddórán ku na sakupán ku tô mga ándà ku pa sakupi.

Pasóddórán ku na ginawaan ku tô mga ándà ku pa pasóddóri na ginawaan ku.”^a

²⁶Asta,

“Agad tun ta lugar na igkagiyan ka Manama tô mga manubù, ‘Ánnà kó mga sakup ku,’ tawarán sikandan na mga gabatà katô manté Manama.”^b

²⁷Igkagi gó si Isaias sayyan tingód katô mga rubbad i Israel, na mà din,

“Agad marapung tô mga rubbad i Israel na di ágkéyap iring na baklayanán tun ta dagat, asal tagsábbadé dád tô tábbusán ka Manama. ²⁸Matuman ni, su di madugé tumanán ka Manama tô igkagi din asta masig dán supakan tô mga manubù nit banuwa.”^c

²⁹Atin ka ándà kédu ka Manama, ándà palang manubù na isamà, su igkagi si Isaias sayyan, na mà din,

“Sikita na mga sakup ka banuwa ka Israel, atin ka ándà palang mga rubbad ta na igsamà ka Áglangngagán na ágpangulu katô langun tun ta langit, makéring ki katô mga taga Sodoma asta taga Gomora naigmatayan ka Manama sippang ka ándà palang isamà.”^d

Mga sakup ka banuwa ka Israel asta Madigár Gulitán

³⁰Purisu ni gó tô isóddórán ta. Agad tô mga ánnà sakup ka banuwa ka Israel na ándà pamasak katô kapókit ébô tanggapán dan ka Manama

^a 9:25 Oseas 2:23 ^b 9:26 Oseas 1:10 ^c 9:27-28 Isaias 10:22-23 ^d 9:29 Isaias 1:9

na nángngà tun ta saruwan din, igtanggap dan ikandin na nángngà tun ta saruwan din ukít katô kapamaké dan ki Cristo. ³¹Asal tô mga sakup ka banuwa ka Israel, agad igpamasak dan katô kapókit ébô tanggapán dan ka Manama na nángngà tun ta saruwan din, ándà dan ikatuman katô mga sugù i Moises. ³²Ándà dan ikatuman su ándà dan pamasaki tô katanggap ka Manama kandan ukít katô kapamaké dan, asal igpamasak dan baling tô katanggap ka Manama kandan ukít katô áglumun dan, su si Jesus iring na batu tun ta dalan na ágkasungkulan dan.^e ³³Mà katô kagi ka Manama na igsulat,

“Paminág kó kanak. Duwán sánnarán ku tun ta lunsud na ánggadanan Sion.^f

Iring sikandin na batu na kasungkulan dan asta gélléyan dan.

Asta tô mamaké kandin, di dan gó kayyaan.”^g

10 ¹Mga kataladi, tô kakalyag ku asta tô ágdasalán ku gó tun ta Manama na mólà pa ka tábbusán din tô mga kadumaan ku Judio. ²Bánnal ni kagi ku tingód kandan na gággar-ággár ágpamasak ka Manama, asal ándà dan ikasóddór ka pamánnun tô nángngà kapamasak kandin. ³Su igélléyan dan tô kapókit na igimu ka Manama ébô tanggapán sikandan na nángngà tun ta saruwan din, asta igsuwé dan baling tun ta kandan kapókit, ándà dan nunug katô kapókit na igimu ka Manama ébô tanggapán sikandan na nángngà tun ta saruwan din, ⁴su ukít katô iglumu i Cristo, ándà dán kailangan na tumanán ta tô mga sugù^h ébô tanggapán ki katô Manama na nángngà tun ta saruwan din. Purisu mému dán tanggapán ka Manama na nángngà tô langun na mamaké ki Cristo.

Mému tábbusán tô langun

⁵Igsulat si Moises tingód katô tanggapán ka Manama na ándà salà tun ta saruwan din ukít ka katuman ka mga sugù, na mà din,

“Kailangan tumanán katô manubù tô langun-langun katô mga sugù ébô duwán kantayan din.”ⁱ

⁶Asal tô igtanggap ka Manama na nángngà tun ta saruwan din ukít katô kapamaké ki Cristo, di mému ka kumagi na, “Kailangan duwán madun tun ta langit ébô papónógán si Cristo.” ⁷Di mému ka kumagi na, “Kailangan duwán madun tun dalám ka tanà ébô antén puman si Cristo,”

^e 9:32 Tô kamatayan i Jesus iring na batu na ágkasungkulan, su tô mga Judio ándà ikasóddór na kailangan maté tô Mesiyas. Purisu igélléyan dan sikandin. ^f 9:33a Sion tô ássa ngadan ka Jerusalem. ^g 9:33b Isaias 8:14; 28:16 ^h 10:4 Su ukít katô iglumu i Cristo, ándà dán kailangan na tumanán ta tô mga sugù, ó su si Cristo tô kapángngaan katô mga sugù. ⁱ 10:5 Levitico 18:5

su ituman dán. ⁸Tô igpamaké ki Cristo, mému ka kumagi kani na igkagi i Moises,

“Madani gó tô kagi ka Manama tun áknikó, su tô gó tô mému gulitán nu asta ágpanámdámmán nu.”^j

Tô gó tô kagi ka Manama na gulit-ulitán dé na kailangan mamaké tô manubù ki Cristo. ⁹Ágtinuruán dé na atin ka mulit kó na si Jesus tô Áglangngagán yu, asta igbánnal kó gó na iganté puman sikandin ka Manama, tábbusán kó ka Manama. ¹⁰Su tô manubù na mamaké ki Cristo tikud tun ta pusung din, tanggapán ka Manama sikandin na nángngà tun ta saruwan din. Asta tô manubù na kumagi tun ta duma mga manubù na bánnal si Jesus tô Áglangngagán din, tábbusán ka Manama sikandin. ¹¹Mà katô kagi ka Manama na igsulat i Isaias tingód ki Cristo, na mà din,

“Atin ka mamaké tô manubù kandin,
dì gó sikandin kayyaan.”^k

¹²Tun ta saruwan ka Manama, ándà kasaan katô Judio asta katô ánnà Judio, su sábbad dád tô Áglangngagán katô langun ágpamaké kandin. Ágkédúwan gó sikandin katô langun manubù na tumawar tun kandin, ¹³su mà katô kagi ka Manama,

“Tábbusán katô Áglangngagán tô langun manubù na tumawar tun ta ngadan din.”^l

¹⁴Duwán basi manubù na manámdám na dì mému ka tumawar tô mga manubù ki Cristo ka ándà dan pa pamaké kandin. Dì dan gó mamaké ki Cristo ka dì dan maminág tingód kandin. Dì dan gó maminág ka ándà manubù na mulit kandan. ¹⁵Ándà gó mulit-ulit kandan tingód ki Cristo ka ándà manubù na papiddán ka Manama tun kandan. Mólà pa ka duwán papiddán ka Manama tun kandan, su duwán igsulat i Isaias sayyan tun ta kagi ka Manama, na mà din,

“Tuu madigár tô kadunggù katô mga manubù na mulit-ulit katô madigár gulitán!”^m

¹⁶Atin ka iring kani tô panámdám ka manubù, ni gó tô taba ku. Duwán dán gó mga manubù na igpapid ka Manama tun ta mga Judio, asal tagsábbadé dád tô igbánnal katô Madigár Gulitán. Tô gó é igkagi katô propeta na si Isaias sayyan, na mà din,

“Áglangngagán ku, tagsábbadé dád tô mga igbánnal katô igulit dé kandan.”ⁿ

¹⁷Purisu isóddóran ta na duwán gó mga igpamaké su igpaminág dan tingód ki Cristo, asta duwán gó mga igpaminág tingód ki Cristo su duwán gó igulit-ulit kandan tingód ki Cristo.

¹⁸Atin ka duwán minsà ka igulitan tô mga Judio tingód ki Cristo, tumaba a na igulitan dan gó, su mà katô kagi ka Manama,

^j 10:6-8 Deuteronomio 30:12-14 ^k 10:11 Isaias 28:16 ^l 10:13 Joel 2:32

^m 10:15 Isaias 52:7 ⁿ 10:16 Isaias 53:1

“Madinág tô kagi tingód ka Manama tun ta langun manubù nit banuwa.

Makadunggù tô kagi ka Manama tun ta kaluwagan kani banuwa.”^o
 19 Atin ka duwán minsà ka ikagpát tô mga rubbad i Israel katô igulit kandan, tumaba a na igéllé dan maminág kani, asal ikagpát tô mga ánnà Judio. Si Moises tô una igpasóddór kani, su igsulat din tô igkagi ka Manama tun ta mga kamónaan ka Judio, na mà din,

“Tanggapán ku tô mga manubù na ágkaringasaan yu ébô kasabuan kó kandan.

Tanggapán ku tô mga manubù na kéman yu ka ágkatuluan dan ébô masókó kó.”^p

20 Tuu matayyó tô kagi ka Manama na igsulat i Isaias sayyan tingód katô mga manubù na ánnà sakup ka banuwa ka Israel, na mà din,

“Kitanánna katô mga ándà pamasak kanak.

Pakita a tun ta mga ándà insà tingód kanak.”^q

21 Asal tingód katô mga sakup ka banuwa ka Israel, igsulat i Isaias tô igkagi ka Manama sayyan, na mà din,

“Idugéya igangat katô mga manubù ébô lumónód dan dini kanak, asal ándà dan bánnal, asta igéllé dan kanak.”^r

Tô kédu ka Manama katô mga Judio

11 ¹Na, agad tagsábbadé dád tô mga Judio^s na igpamaké, atin ka duwán minsà kanak ka igtayyugan ka Manama tô mga Judio na igsalin din, tumaba a na ándà gó tayyugi tô langun ta! su sakán tô sábbad rubbad i Israel. Si Abraham tô kamónaan ku, asta sakuppa katô grupo i Benjamin, asal ándà a tayyugi ka Manama. ²Ándà tayyugi ka Manama tô mga Judio na taganà din igsalin sayyan. Panámdám yu tô igsulat tun ta kagi ka Manama tingód katô propeta sayyan na si Elias. Tô igdasal sikandin tun ta Manama, igulit sikandin tingód katô madat na iglumu katô mga Judio, na mà din,

³ “Áglangngagán ku, igmatayan dan tô duma mga propeta nu.

Igdadattan dan tô mga ággóbbówanan katô ágbággén dé áknikó.

Sábbad ku dád man isamà, asta mimmaté dan pád kanak.”^t

⁴Yakó yu ágkalingawi ni igtaba katô Manama kandin, na mà din,

“Ágtómmóngan ku tô pittu mararan (7,000) mga gamama na ándà pangadap katô ágmanaman na ánggadan Baal.”^u

⁵Purisu iring kani, duwán pagsik tagsábbadé na mga Judio áknganni na igpamaké. Igsalin ki ka Manama su tuu dakál tô kédu din. ⁶Su ánnà ukit

^o 10:18 Salmo 19:4 ^p 10:19 Deuteronomio 32:21 ^q 10:20 Isaias 65:1

^r 10:21 Isaias 65:2 ^s 11:1 Judio tô ássa ngadan katô mga Hebreo ó mga rubbad i Israel.

^t 11:3 1 Mga Harì 19:10,14. ^u 11:4 1 Mga Harì 19:18.

katô madigár iglumu ka mga manubù tô kasalin din kandan, asal ukit dád katô kédu din. Atin ka salinán ka Manama tô mga manubù ukit katô madigár iglumu dan, ándà dán ágpulusán katô kédu din.

⁷Purisu su tagsábbadé dád tô mga Judio na igsalin ka Manama, ni gó tô isóddóran ku. Agad igággár-ággár tô mga Judio igpamasak katô kapókit ébô matanggap dan ka Manama na nánngà tun ta saruwan din, asal tô karapungan dan ándà ikakita. Ikakita dád tô mga Judio na igsalin ka Manama, asal tô duma mga Judio igpatággas tô mga ulu dan. ⁸Tô gó tô igpasóddór tun ta kagi ka Manama, na mà din,

“Iring na igpatudug ka Manama sikandan.

Agad duwán mata dan, inéring dan katô ò pakakita.

Agad duwán talinga dan, inéring dan katô ò pakadinág sippang áknganni.”^v

⁹Iring kani tô igsulat i Harì David sayyan tingód katô mga usig din, na mà din,

“Mólà pa ka ukit katô mga ágkadigárran dan, tigkô dád mammát asta supakan dan.

¹⁰Mólà pa ka imun sikandan iring na bólóg ébô ò dan pakakita katô kabánnalan.

Mólà pa ka inalayun baban dan tô mabággat iring katô ágbaban ka mga állang.”^w

¹¹Na, atin ka duwán minsà, “Tô ikasalà tô mga Judio ukit katô kélé dan ki Cristo, igdiyà dan tikud tun ta Manama ka ándà ágtamanán?” Tumaba a na ándà! Asal su ikasalà tô mga Judio, marapung dán tô mga ánnà Judio na ágtábbusán ka Manama ébô kasabuan pád tô mga Judio kandan asta mamaké dan ki Cristo. ¹²Su ikasalà tô mga Judio, igtabangan ka Manama tô duma mga manubù nit banuwa. Su ikasalà tô mga Judio, igtabangan ka Manama tô mga ánnà Judio. Purisu atin ka mamaké ki Cristo tô langun Judio na igsalin ka Manama, tuu pa madigár tô katamanan!

Igpasakup tô mga ánnà Judio

¹³Na, sikiyu na ánnà Judio, duwán sulatán ku ákniyu. Igimuwa ka Manama na apostoles ébô tinuruan ku tô mga ánnà Judio. Tuu madigár ni áglumun ku ¹⁴asta kakalyag ku na kasabuan tô mga kadumaan ku Judio ákniyu na ánnà Judio ébô duwán tun kandan na mamaké asta matábbus. ¹⁵Tô igtayyug tô Manama katô karapungan ka mga Judio, igpasábbadé tô Manama asta tô mga ánnà Judio. Purisu atin ka mamaké tô mga Judio ki Cristo, tanggapán dan ka Manama, asta méring dan na inaté manubù na inaté puman.

^v 11:8 Isaias 29:10; Deuteronomio 29:4 ^w 11:10 Salmo 69:22-23

¹⁶Atin ka bággén tun ta Manama tô sábbad bahin ka pan, kandin pagsik tô tibuk pan.^x Atin ka bággén tun ta Manama tô mga dalid ka kayu, kandin pagsik tô mga panga ka kayu.

¹⁷Tô karapungan ka mga Judio na ándà tanggapi ka Manama, iring dan katô mga panga ka kayu olibo na igtampád. Asal sikiyu na mga ánnà Judio na igtanggap ka Manama, iring kó na mga panga ka kayu olibo na igtubù tun ta kabánnásson, asal igkangé asta igsugpat duma katô isamà mga panga tun ta lawa ka kayu na igpamula. Purisu igsakup kód ka Manama tun ta mga manubù na makatanggap katô igtandô din ki Abraham asta katô mga rubbad din. ¹⁸Purisu sikiyu na mga ánnà Judio, di mému ka miringasa kó katô mga Judio na ándà tanggapi ka Manama, agad inéring dan na mga panga na igtampád. Yakó ágpdadurung. Yakó yu ágkalingawi na ánnà tikud tun ta panga tô kalambù ka dalid, asal tikud tun ta dalid tô kalambù ka panga.

¹⁹Duwán basì ánnà Judio na kumagi, “Igtayyugan ka Manama tô mga Judio iring na mga panga na igtampád ébô sikami na ánnà Judio tô tanggapán din, iring na mga panga na igsugpat.” ²⁰Tô taba ku na bánnal gó ni. Tô mga Judio, iring dan na mga panga na igtampád su ándà dan pamaké ki Cristo. Asal sikiyu na ánnà Judio, iring kó na mga panga na ándà tampáddi ukit dád katô kapamaké yu. Purisu yakó ágpdadurung, asal kailangan banté kó. ²¹Ándà kédu ka Manama katô mga Judio na iring na bánnal panga ka kayu, asta igiwà din sikandan. Purisu isóddóran yu na ándà kédu din ákniyu, asal iwaán kó pagsik ikandin ka di kó manayun mamaké. ²²Purisu isóddóran tad na duwán kédu ka Manama asta duwán kaganiyan ka Manama. Igpéwà din tô mga Judio na ándà panayun pamaké. Asal duwán kédu din katô tagsábbad-sábbad ákniyu na ánnà Judio ka manayun kó tumanggap katô kédu din. Asal ka di kó manayun mamaké kandin, imun kó ikandin iring na panga na tampáddán. ²³Atin ka mamaké tô mga Judio ki Cristo, sakupán dan puman ka Manama iring na mga panga na sugpatán puman tun ta kayu, su mému din sakupán puman sikandan. ²⁴Tô tagsábbad-sábbad ákniyu na ánnà Judio, madiyù kó tun ta Manama dángngan, asal duwán dán igpulus yu tun ta tabang ka Manama katô mga Judio, su iring kó na mga panga na igtampád tun ta kayu na igtubù tun ta kabánnásson, asta igsugpat kó baling tun ta kayu na igpamula. Purisu malumák tanggapán puman ka Manama tô mga Judio na taganà igsakup din, su iring dan na mga panga na sugpatán puman tun ta kayu olibo na taganà igtampáddan.

^x **11:16** Tô kóbadan: Mému pagsik sakupán ka Manama tô mga Judio su sikandan tô mga rubbad katô mga kamónaan dan sayyan na igsakup ka Manama.

Tô kedu ka Manama para katô langun manubù

²⁵Mga kataladi na ánnà Judio, mólà pa ka kagpáttan yu ni kabánnalan^y na ándà pasóddóri ka Manama sippang áknganni ébô dì kó ágpapadurung asta dì kó ágpanámdám na sikiyu dád tô ágginawaan ka Manama. Inalayun matággas tô ulu ka karapungan ka mga Judio sippang ka masakup tô langun ánnà Judio na igsalin ka Manama. ²⁶Ka matuman ni, tábbusán ka Manama tô mga Judio, su mà katô kagi ka Manama,

“Tô Taratábbus tumikud ka Sion.”^z

Tábbusán din tô mga rubbad i Jacob.”^a

²⁷Mà katô kagi ka Manama,

“Ni gó tô kasabotan ku kandan, pasinsiyaan ku tô salà dan.”^b

²⁸Ukit katô kéllé katô mga Judio katô Madigár Gulitán tingód ki Cristo, inéring dan na mga usig ka Manama. Purisu duwán gó igpulus yu. Asal ukit katô kasalin ka Manama kandan, dakál pa tô ginawa ka Manama kandan tingód katô igtandô din tun ta mga kamónaan dan.

²⁹Dì ágkapalin tô panámdám ka Manama tingód katô mga manubù na igsalin din asta igbággayan din ka mga gasa. ³⁰Sikiyu na ánnà Judio, ándà kó bánnal ka Manama dángngan, asal su ándà bánnal tô mga Judio ka Manama, inéduwan baling tô Manama ákniyu. ³¹Iring kani, agad dì ágbánnal tô karapungan katô mga Judio áknganni, asal tun ta tapuri álló kéduwan puman tô Manama kandan iring katô kedu din ákniyu na ánnà Judio. ³²Igpasóddór ka Manama na iglumu ka salà tô langun manubù, agad Judio ó ánnà Judio, ébô pakitanán din tô kedu din tun ta langun.

Kapasalamat tun ta Manama

³³Ágkasalábbuanna katô tuu madigár kapandayan katô Manama asta tô isóddóran din! Dì ágkagpáttan tô panámdám din, asta dì ágkasóddóran tô kapókit ka mga iglumu din áknita! ³⁴Igpasóddór ni ukit kani kagi ka Manama na igsulat, na mà din,

“Ándà manubù na ikasóddór katô panámdám katô Áglangngagán ta.

Ándà manubù na ikatinurù kandin ka ándin tô nángngà lumun din.”^c

³⁵“Ándà manubù na igbággé ka gasa tun ta Manama ébô sulian sikandin ka Manama, su tô langun na ágbággén ta tun kandin taganà igtanggap ta tikud tun kandin.”^d

³⁶Isóddóran ta na bánnal ni, su tô langun na duwán áknganni, tô gó tô igimu ka Manama asta ágpanguluwan din ébô durungán sikandin ukit ka langun. Mólà pa ka pabantugán sikandin ka ándà ágtamanán! Matuman ni.

^y 11:25 Tingód kani kabánnalan, ahaán tô Roma 16:25 ^z 11:26a Sion tô ássa ngadan ka Jerusalem. ^a 11:26b Isaias 59:20-21 ^b 11:27 Isaias 27:9 ^c 11:34 Isaias 40:13-14
^d 11:35 Job 35:7; 41:11

Bággé yu tô sarili yu tun ta Manama

12 ¹Mga kataladi, su inalayun duwán kédu ka Manama áknita, ni gó tô kagin ku katô langun yu. Kailangan bággén yu tô sarili yu tun ta Manama, iring na ugis ágbággén tun kandin. Sikiyu gó tô manté ágbággén na ágkadigárran din. Tô gó tô nángngà áglumun ka manubù na igpasakup tun kandin. ²Yakó yu giringi tô áglumun ka mga manubù na di ágpamaké nit banuwa, asal pamuyù kó baling na palinán ka Manama tô áglumun yu ukit ka kapamantu din katô panámdám yu ébô makasóddór kó ka ándin tô kakalyag ka Manama na lumun yu. Purisu makasóddór kó ka ándin tô madigár, tô nángngà asta tô makabággé ka dayó tun kandin.

³Su ukit ka tabang ka Manama igimuwa ikandin na apostoles din, ni gó tô sugù ku tun ta langun yu na ágpamaké. Yakó ágpanámdám na mallayat kó sobra pa katô kabánnalan. Asal kailangan ándà salà tun ta panámdám yu ukit katô igbággé ka Manama ákniyu tô igpamaké kó kandin. ⁴Agad sábbad dád tô lawa ka manubù, asal marapung tô mga bahin ka lawa, asta ássa-ássa tô ágkagamitan katô mga bahin ka lawa. ⁵Iring kani, agad marapung ki na ágpampamaké, asal igpasábbadé ki su igpamaké ki ki Cristo, asta mataladi ki langun. ⁶Ássa-ássa tô mga klasi ka gasa na igbággé ka Manama tun ta tagsábbad-sábbad áknita ukit katô kédu din. Purisu kailangan gamitán ta tô gasa na igbággé ka Manama ébô patabangé ki. Tô mga manubù na igbággayan ka Manama ka gasa na gulit-ulit ka mga kagi tikud tun ta Manama,^e kailangan mulit-ulit dan ukit katô kapamaké na igbággé ka Manama. ⁷Tô mga manubù na igbággayan ka gasa na ágtabang, kailangan tumabang. Tô mga manubù na igbággayan ka gasa na ágtinurù, kailangan tuminurù. ⁸Tô mga manubù na igbággayan ka gasa na ágpabákkár ka duma mga ágpampamaké, kailangan tumuman. Tô mga manubù na igbággayan ka gasa na ágbággé tun ta mga ágkahirapan, kailangan di dan ágduwa-duwa ágbággé. Tô mga manubù na igbággayan ka gasa na ágpangulu katô mga ágpampamaké, kailangan di dan ágbaring-baring na ágpangulu. Tô mga manubù na igbággayan ka gasa na ágtabang katô mga ágkayù-ayuan, kailangan kadayawan na ágtabang.

⁹Kailangan bánnal tô ginawa yu tun ta duma mga manubù. Kailangan karingasayi yu tô madat. Kailangan mággár-ággár kó lumumu ka madigár tun ta saruwan ka Manama. ¹⁰Paginawaé kó iring na mga mataladi. Kailangan maggát kó parespetowé. ¹¹Yakó ágpatukuk-tukuk ágbánnal ka Manama. Pakita kó na duwán Ugis Espiritu tun ákniyu. Bánnal kó katô kakalyag ka Áglangngagán. ¹²Kailangan kadayawan kó su

^e 12:6 Mga kagi tikud tun ta Manama, ó propesiya.

duwán gimanan yu. Atin ka girrayatan kó, tiis kó. Kailangan inalayun kó dumasal. ¹³Tabangi yu tô duma mga sakup ka Manama na ágkahirapan, asta kailangan alit-alit yu tô mga bisita.

¹⁴Pamuyù kó tun ta Manama ébô duwán kédu din para katô mga manubù na girrayat ákniyu. Yakó ágpamuyù na pasupakan dan, asal dasal kó ébô duwán kédu din kandan. ¹⁵Atin ka kadayawan tô duma manubù, kailangan pasábbadé kó kadayawan. Atin ka duwán ágranu, kailangan pasábbadé kó ágranu. ¹⁶Kailangan magunawa tô kalit-alit yu katô tagsábbad-sábbad. Yakó ágpdadurung, asal madigár ka paduma kó katô mga manubù na mabbabà é kamanubuan. Yakó ágpallayat-layat.

¹⁷Atin ka duwán lumumu ka madat ákniyu, yakó ágsulì ka madat. Panámdám kó baling ka ándin é kapókit na makému kó ka madigár tun ta tubang ka mga manubù. ¹⁸Lumu yu tô ágkagaga yu na pakabággé ka kasunayan tun ta langun ka duma mga manubù.

¹⁹Mga ágginawaan ku, yakó ágsulì katô mga manubù na iglumu ka madat ákniyu. Asal angati yu tô supak ka Manama kandan, su mà katô kagi ka Manama na igsulat,

“Igkagi tô Manama, sakán tô sumulì kandan.

Sakán tô sumupak katô mga iglumu ka madat ákniyu.”^f

²⁰Kailangan tumanán yu ni kagi ka Manama na igsulat, na mà din,

“Atin ka ágballusán tô manubù na gusig ákniyu, pakan yu sikandin.

Atin ka ágkatákkangan, pénám yu,

su ukit ka tabang yu kandin, tuu kayyaan sikandin.”^g

²¹Atin ka madat tô lumun yu tun ta manubù na iglumu ka madat ákniyu, talun kó ka madat ukit ka kasulì yu. Asal ka madigár tô lumun yu tun ta manubù na iglumu ka madat ákniyu, makapanalu kó tun ta madat.

Tô lumun ta tun ta mga opisyaales ka gobyerno

13 ¹Kailangan bannalán katô langun yu tô mga opisyaales ka gobyerno, su Manama tô ágpapangulu katô mga opisyaales. Ándà ássa makapangulu. Igsalin ka Manama tô langun pangulu. ²Purisu tô gatú katô mga opisyaales ka gobyerno gatú katô igsalin ka Manama, asta tô gatú dungguan gó ka supak. ³Tô mga manubù na áglumu ka madigár dì nángngà kamáddangan katô mga pangulu. Asal tô mga áglumu ka madat, tô gó tô nángngà kamáddangan katô mga pangulu. Purisu ka malyag kó na dì kó kamáddangan ka mga opisyaales ka gobyerno, lumu kó ka madigár. Atin ka madigár tô áglumun yu, durungán kó ikandan. ⁴Mga ágsuguánnán ka Manama tô langun opisyaales ébô madigár tô kóddô yu. Atin ka madat tô áglumun yu, nángngà ka kamáddangan kó, su nángngà

^f 12:19 Deuteronomio 32:35 ^g 12:20 Panultihon 25:21-22Tuú kayyaan sikandin, ó limudán yu tô mga бага tun ta bówwó katô ulu din.

tô supak dan ákniyu. Sikandan tô mga ágsuguánnán ka Manama ébô supakan tô manubù na áglumu ka madat. ⁵Purisu kailangan mánnal kó katô mga opisyaales ka gobyerno, ánnà dád ébô ñi kó supakan, asal su isóddóran yu na nángngà tô kabánnal yu kandan.

⁶Kailangan mayad kó ka buwis, su ágsuguánnán ka Manama tô mga opisyaales na ágtuman ka mga sugù ka gobyerno. ⁷Purisu bayad kó katô bayadanan ka gobyerno. Bayad kó katô langun klasi ka buwisanan ka gobyerno. Respetowi yu tô kailangan respetowan, asta pabantug yu tô kailangan pabantugán.

Tô lumun ta tun ta unawa ta

⁸Dì mému ka manayun kó na ñi mayad katô utang yu, asal kailangan manayun kó paginawaé. Atin ka dakál tô ginawa ka manubù tun ta unawa din, igtuman dán sikandin katô langun sugù. ⁹Duwán mga sugù na igsulat, “Yakó áglibug. Yakó ágmaté. Yakó ágtakó. Yakó ágkasabuan.” Duwán pagsik duma mga sugù na igsulat, asal igpasábbad tô langun tun ta sábbad dád sugù na, “Ginawayi yu tô mga unawa yu na iring katô kaginawa yu katô ákniyu sarili.”^h ¹⁰Atin ka ginawaan yu tô unawa yu, ándà madat na lumun yu kandan. Purisu tô manubù na ágginawa katô unawa din, tô gó tô igtuman katô langun sugù.

¹¹Tuman yu ni igkagi ku ákniyu, su isóddóran yu ka ándin tô timpo áknganni. Isóddóran yu na ni gó tô oras na kailangan ngumilam kó iring na manubù na ikatanud, su madani dán tô álló na paluwaán ki i Cristo ka tandingán katô mantu ki pa igpamaké kandin. ¹²Asal masig dán mapángnga tô kóddô ta nit banuwa, iring na dukilám na masig dán kumalló, su masig lumónód si Cristo. Purisu kailangan sumugban ki lumumu ka madat iring katô áglumun tun ta kangittángngan, asta kailangan lumumu ki katô makatabang áknita ébô makapanalu ki katô pangulu ka madat. Madigár ka méring ki katô sundalo na gumpak ka salimbutung álló-álló. ¹³Kailangan nángngà tô áglumun ta iring na nigó tô álló na lumónód si Cristo. Kailangan ñi ki ágsamuk asta ágkalasing. Kailangan ñi ki lumayuk katô ánnà áknita sawa ó duma. Kailangan ñi ki papulé, asta ñi ki kasabuan. ¹⁴Asal kailangan pakitanán tô ágkémun katô Áglangngagán ta na si Jesu-Cristo tun ta ákniyu kantayan. Yakó ágpanámdám tingód katô katuman yu ka madat mga kakalyag yu.

Yakó ágruud katô mga duma manubù

14 ¹Na, tanggap yu tô mga ágpampamaké agad ánnà magunawa tô panámdám dan tingód katô mému áglumun dan. Atin ka tanggapán yu sikandan, yakó ágbuyas kandan tingód katô panámdám dan. ²Duwán mga manubù na ágpanámdám na mému makan tô

^h 13:9 Exodo 20:13-15,17; Deuteronomio 5:17-19,21; Levitico 19:18

langun klasi ka ágkakan. Duwán pagsik ágpanámdám na gulay dád tó mému makan. ³Tô mga manubù na ágpanámdám na mému makan tó langun klasi ka ágkakan, kailangan di dan muyas katô mga manubù na ágpanámdám na di mému tun ta Manama ka makan tó langun. Tô mga manubù na ágpanámdám na di mému makan tó langun klasi, kailangan di dan rumuud katô mga manubù na ágpanámdám na mému makan tó langun, su Manama tó igtanggap kandan. ⁴Manama tó igsakup kandan, ánnà sikiyu. Purisu di mému ka rumuud kó katô ánnà sakup yu na ágpanámdám na mému makan tó langun, su Manama dád tó tumanggap ó rumuud áknita na mga sakup din, iring na amo na tumanggap ó rumuud katô mga sakup din. Matanggap dan ka Manama agad kuman dan katô langun ó di, su Áglangngagán ta tó makapabákkár katô kapamaké dan.

⁵Duwán mga manubù na ágpanámdám na kada linggo, sábbad dád tó álló na nángngà para mangadap ka Manama. Duwán pagsik mga manubù na ágpanámdám na nángngà tó langun ka álló para mangadap ka Manama. Kailangan manámdám tó tagsábbad-sábbad manubù asta sumalin ka ándin tó madigár para kandin. ⁶Tô mga manubù na igsalin ka sábbad álló, igsalin dan ébô pabantugán tó Manama. Asta tó mga manubù na ágpanámdám na mému ka makan tó langun, ágkan dan ébô Manama tó pabantugán dan, su Manama tó ágpasalamatán dan tingód katô ágkakan dan. Asta tó mga manubù na ágkan dád ka gulay, ágkan dan ébô Manama tó pabantugán dan, asta Manama pagsik tó ágpasalamatán dan tingód katô ágkakan dan. ⁷Di ki manté asta di ki maté tingód katô áknita sarili, ⁸su róggun ka manté ki pa, Áglangngagán tó igpasakupan ta asta ágpadayón. Agad maté ki, Áglangngagán tó padayón ta. Purisu agad manté ki ó maté ki, Áglangngagán tó igpasakupan ta asta ágpadayón, ⁹su inaté asta inaté puman si Cristo ébô imun sikandin na Áglangngagán katô langun manubù, agad tó mga inaté ó tó mga manté pa.

¹⁰Sikiyu na mga ágpampamaké na ágtuman katô mga ágkémun yu, di mému ka rumuud kó katô kataladi yu na di ágtuman kani. Asta sikiyu na mga ágpampamaké na di ágtuman katô mga ágkémun na ágtumanán ka kataladi yu, di pagsik mému ka muyas kó kandan, su langun ta tó tumubang tun ta Manama ébô pasóddórán din ka nángngà tó iglumu ta. ¹¹Bánnal ni, su mà katô kagi ka Manama na igsulat,

“Igakagi tó Áglangngagán: Matuman gó ni kagin ku ákniyu.

Lumíngkóód tó langun manubù kanak, asta kumagi tó langun na Manama a.”ⁱ

¹²Purisu isóddórán ta na tumubang tó tagsábbad-sábbad áknita tun ta Manama ébô rumuud sikandin katô langun na iglumu ta.

ⁱ 14:11 Isaias 45:23

¹³Purisu yakó ágpabuyasé. Asal kailangan ándà lumun yu na makapid ka kataladi yu ébò makasalà. ¹⁴Ukit katô kapasábbad ku tun ki Jesus, isóddóran ku gó na ándà palang klasi ka ágkakan na di mému kannán ta. Asal ka manámdám tô manubù na duwán di mému kannán, di mému ka kuman sikandin. ¹⁵Atin ka kadattan tô panámdám katô kataladi yu ukit katô ágkannán yu, ándà ginawa yu kandin. Yakó ágdadat katô kapamaké ka kataladi yu ukit katô ágkannán yu, su inaté si Cristo tun ta krus bullas kandin. ¹⁶Iring pagsik kani, agad isóddóran yu na duwán mému lumun, yakó áglumu kani ka buyasán kó ka mga дума. ¹⁷Tun áknita na mga sakup ka pagpangulu ka Manama, ándà palang sugù tingód katô ágkannán ta asta ginámmán ta. Asal kailangan ándà salà ta, asta masuné tô ginawa ta tun ta kataladi ta, asta kadayawan ki ukit ka tabang katô Ugis Espiritu. ¹⁸Atin ka bánnalán ta si Cristo ukit ka katuman ta kani, kadayawan tô Manama asta respetowan ki katô дума mga manubù.

¹⁹Purisu kailangan mággár-ággár ki lumumu ka kasunayan para katô mga ágpampamaké, asta patabangé ki ébò kumasarig tô kapamaké ta ki Cristo. ²⁰Yakó ágdadat katô íglumu ka Manama tun ta kataladi yu ukit katô kakan yu katô di din makan. Agad mému gó tun ta Manama ka makan tô langun klasi ka ágkakan, asal di mému ka mapid tô kataladi yu makasalà ukit katô ágkakan yu. ²¹Madigár pa ka di ki kuman ka karne, asta di ki minám ka bino, asta di ta lumun tô agad ándin ébò di mapid makasalà tô kataladi ta ukit katô áglumun ta. ²²Agad ándin tô panámdám yu tingód katô mému áglumun yu, yakó ágpasóddór kanan tun ta дума manubù, su nángngà ka Manama dád tô ikasóddór kanan. Kadayawan tô Manama tingód katô mga manubù na ikasóddór na nángngà tô áglumun dan asta ándà áglumun dan na makayayà kandan. ²³Asal tô mga manubù na ágduwa-duwa su ándà dan ikasóddór ka kadayawan tô Manama tingód katô ágkannán dan, atin ka kuman dan, makalumu dan ka salà su áglumun dan tô ánnà nángngà para kandan. Atin ka lumun katô manubù tô ánnà nángngà tun ta panámdám din, makalumu sikandin ka salà.

15 ¹Na, sikita na ikasóddór na igtanggap tô Manama na nángngà ki tun ta saruwan din, kailangan mallayat tô ginawa ta tingód katô mga ágpampamaké na ágduwa-duwa, su di mému ka tumanán ta dád tô áknita kakalyag. ²Kailangan lumun katô tagsábbad-sábbad áknita tô makapasarig ka kapamaké katô дума. ³Kailangan makéring ki ki Cristo, su ánnà kandin kakalyag tô igtuman din. Agad igbuyas ka mga manubù sikandin, asal igtuman din tô kakalyag ka Manama, su duwán igsulat tun ta Salmo,

“Isakitanna katô mga kabuyas ka mga manubù na igbuyas áknikó.”^j

⁴Igsulat tô kagi ka Manama sayyan ébò tinuruan ki, su ukit ka kabasa ta kani, kumallayat tô ginawa ta, asta kumabákkár tô ginawa ta róggun na giman ki katô katuman ka Manama katô langun na igtandò din.

j 15:3 Salmo 69:9

⁵Manama tô ágtikudan ka mallayat ginawa ta asta ágtikudan katô bákkár ka ginawa ta. Mólà pa ka tabangan kó ikandin ébô pasábbadé kó tun ta panámdám asta ágkagin yu, iring katô iglumu i Jesu-Cristo ⁶ébô pasábbadé kó dumurung ka Manama na Ámmà katô Áglangngagán ta na si Jesu-Cristo.

Tanggapán ka Manama tô mga ánnà Judio

⁷Purisu patanggapé kó ébô durungán tô Manama ukit katô kéring yu ki Cristo. Patanggapé kó iring katô katanggap i Cristo ákniyu. ⁸Yakó yu ágkalingawi na ukit katô iglumu i Cristo, itabangan ké na mga Judio ébô pasóddórán din na ágkasarigan tô Manama. Igtuman i Cristo tô igtandô ka Manama tun ta mga kamónaan dé sayyan. ⁹Igpasóddór din tun ta mga ánnà Judio na duwán kédu katô Manama kandan ébô dumurung dan kandin, su mà katô kagi ka Manama na igsulat,

“Purisu agad dutun ta mga ánnà Judio, durungán ku sikuna, asta kumanta a ébô pabantugán ku sikuna.”^k

¹⁰Duwán pa kagi ka Manama na igsulat,

“Sikiyu na mga ánnà Judio, duwán dán kadayawan yu duma katô mga Judio na taganà igsalin ka Manama.”^l

¹¹Duwán pa kagi ka Manama na igsulat,

“Tô langun yu na mga ánnà Judio, durung kó katô Áglangngagán. Mólà pa ka langun manubù tô dumurung kandin.”^m

¹²Duwán pagsik igsulat katô propeta na si Isaias sayyan, na mà din,

“Tikud tun ta mga rubbad i Isai, duwán dumungù na mangulu katô mga ánnà Judio.

Sikandin tô gimanan dan ébô tumuman katô igtandô.”ⁿ

¹³Gimanan yu na tumanán ka Manama tô langun katô igtandô din. Mólà pa ka bággayan kó ikandin ka bánnal kadayawan asta kasunayan ka ginawa tingód katô kapamaké yu kandin ébô kumabákkár tô pagiman yu katô igtandô din ukit katô katulusan ka Ugis Espiritu.

Tô gunayan katô sulat i Pablo

¹⁴Mga kataladi, isóddórán ku gó na tuu madigár tô áglumun yu tun ta duma mga manubù, isóddórán yu tô kabánnalan, asta makému kó patinurué. ¹⁵Asal maganiya ágsulat ákniyu ébô di yu kalingawan ni igkagi ku. Ukit katô kédu ka Manama kanak, igsalinna ikandin ¹⁶ébô imunna na ágsuguánnán i Jesu-Cristo tun ta mga ánnà Judio. Igpapidda na mulit kandan katô Madigár Gulitán ka Manama ébô tanggapán ka Manama tô mga ánnà Judio na mamaké, iring katô ágbággén tun kandin na iglinisan katô Ugis Espiritu.

^k 15:9 Salmo 18:49; 2 Samuel 22:50 ^l 15:10 Deuteronomio 32:43 ^m 15:11 Salmo 117:1
ⁿ 15:12 Isaias 11:10

¹⁷Purisu su igpasakuppa ki Jesu-Cristo, ándà kayyaan ku tingód katô áglumun ku para katô Manama. ¹⁸Kumagiya dád ákniyu tingód katô iglumu i Cristo ukit kanak ébô mánnal tō mga ánnà Judio ukit katô katinurù ku asta kalumu ku, ¹⁹asta tingód katô mga kasalábbuan na iglumu ku. Tō gó tō iglumu ku ukit katô katulusan ka Ugis Espiritu. Purisu igsadunna tun ta mga lunsud tikud tun ta Jerusalem sippang tun ta Ilirico ébô tumanán ku tō kólit-ólit ku katô Madigár Gulitán tingód ki Cristo. ²⁰Tō igulit-ulitta katô Madigár Gulitán, inalayun duwán kakalyag ku na mulit-ulitta tun ta mga lugar na duwán mga manubù na ándà pa ikasóddór tingód ki Cristo, su kakalyag ku na diya mulit-ulit katô mga manubù na taganà dán igulit-ulitan ka duma. ²¹Tō áglumun ku iring katô igsulat tun ta kagi ka Manama tingód katô Mesiyas,

“Tō mga manubù na ándà pa kóliti tingód kandin, tō gó tō makagpát katô kabánnalan,

asta tō mga manubù na ándà pa ikadinág tingód kandin, tō gó tō maminág asta makagpát katô kagi din.”^o

Igplano si Pablo na madun tun ta Roma

²²Ándà ku pa tumani tō kakalyag ku na madunna tun ákniyu su ágtinurù a tun ta ássa-ássa mga lugar. ²³Asal áknganni, ikatinurù a kannun ta langun lugar, asta duwán dán kakalyag ku na madunna tun ákniyu. ²⁴Purisu tō plano ku na máddingnga tun ákniyu ka madunna tun ta Espanya. Tuuwa kadayawan ka makóddô a tun ákniyu agad di madugé, asta makatabang kó kanak ka manayunna tun ta Espanya. ²⁵Asal madunna pa tun ta Jerusalem ébô piddán ku tō salapì na tabang para katô mga sakup ka Manama. ²⁶Kakalyag katô mga manubù nit Macedonia asta Grecia na tumabang dan katô ágkayù-ayuan mga sakup ka Manama tun ta Jerusalem. ²⁷Tō gó tō kandan kakalyag ébô katabangan tō mga Judio. Asal tō gó tō kasulì dan kandan, su ukit katô mga Judio, igulitan dán tō mga ánnà Judio katô kagi ka Manama. Purisu nángngà ka tabangan katô mga ánnà Judio tō mga Judio na ágkahirapan. ²⁸Purisu pángnga piddán ku tō salapì na tabang tun kandan, máddingnga tun ákniyu ka diya pa madun tun ta Espanya. ²⁹Isóddóran ku na ka madunna tun ákniyu, marapung tō madigár na matanggap ta tikud tun ki Cristo.

³⁰Mga kataladi, igpasábbadé ki tun ta Áglangngagán ta na si Jesu-Cristo, asta ágpaginawaé ki ukit katô Ugis Espiritu. Purisu kakalyag ku na dumasal kó tun ta Manama tingód kanak. ³¹Dasal kó na dóppónanna ikandin ébô diya dadattan ka mga Judio na ándà pa pamaké tun ta Judea. Dasal kó na tumanggap tō mga sakup ka Manama tun ta Jerusalem katô tabang na piddán ku tun kandan. ³²Tō gó tō dasalán

^o 15:21 Isaias 52:15

yu ébô ka duwán kakalyag ka Manama, kadayawanna na makasadun tun ákniyu, asta kumabákkár tō ginawa ku ka máddingnga tun ákniyu. ³³Mólà pa ka dumaan kó katō Manama na ágbággé ka kasunayan. Matuman ni.

Igpangumusta si Pablo katō mga manubù

16 ¹Na, madigár tō ulitán ku ákniyu tingód ki Febe na sábbad tábbé ta na opisyales ka simbaan tun ta Cencrea. ²Atin ka dumunggù sikandin tun ákniyu, tanggap kó kandin tingód katō kapasakup din tun ta Áglangngagán ta, su kailangan tanggapán ta tō mga sakup ka Manama. Atin ka duwán ágkailanganán din, tabang kó kandin, su sikandin tō igtabang katō marapung manubù. Agad sakán, igtabanganna pagsik ikandin.

³Ágpangumusta a ki Priscila asta katō duma din na si Aquilas, su sikandan tō igtabang kanak tō igtinurù a tingód ki Jesu-Cristo. ⁴Ikataganà dan na matayan ébô katabanganna ikandan. Purisu ágpasalamat kandan, asta ágpasalamat kandan tō langun ágpampamaké kannun na ánnà Judio. ⁵Ágpangumusta a pagsik katō langun manubù na ágpangadap tun ta kandan balé.

Ágpangumusta a ki Epeneto na ágginawaan ku. Sikandin tō una manubù na igpamaké ki Cristo tun ta probinsya ka Asia. ⁶Ágpangumusta a ki Maria, su tuu ipagud sikandin na ágtabang ákniyu. ⁷Ágpangumusta a ki Andronico asta ki Junias na kadumaan ku Judio asta igpriso duma kanak. Sikandan tō ágrespetowan katō mga apostoles,^p asta una dan pa kanak na igpamaké ki Cristo.

⁸Ágpangumusta a ki Ampliato na sábbad sakup katō Áglangngagán ta na ágginawaan ku. ⁹Ágpangumusta a ki Urbano na duma dé ágtinurù tingód ki Cristo, asta ki Estakis na ágginawaan ku. ¹⁰Ágpangumusta a ki Apeles na ikatiis igpamaké ki Cristo agad igkinnaman sikandin. Ágpangumusta a katō mga ágpampamaké na góddô tun ki Aristobulo. ¹¹Ágpangumusta a ki Herodion na kadumaan ku Judio. Ágpangumusta a katō mga ágpampamaké na góddô tun ki Narciso.

¹²Ágpangumusta a ki Trifena asta ki Trifosa, su gággar-ággár dan áglumu para katō Áglangngagán. Ágpangumusta a ki Persida na ágginawaan dé asta gággar-ággár áglumu para katō Áglangngagán. ¹³Ágpangumusta a ki Rufo na ágkabantug ágsarig katō Áglangngagán. Ágpangumusta a pagsik katō innà din na ágkéduwan kanak iring na bánnal innà ku. ¹⁴Ágpangumustaan ku si Asincrito, si Flegonte, si Hermes, si Patrobas, si Hermas, asta tō langun kataladi na ágpangadap tun ta balé dan. ¹⁵Ágpangumustaan ku si Filologo, si Julia, si Nereo

^p 16:7 Ágrespetowan katō mga apostoles, ó apostoles na ágrespetowan.

asta tô tábbé din, asta si Olimpás, asta tô langun sakup ka Manama na ágpálimudé asta ágpangadap duma kandan.

¹⁶Tô langun yu na ágpamaké ki Cristo, atin ka malimud kó mangadap, kailangan papangumustaé kó, su tô gó tô pató na sikita tô mga sakup ka Manama. Tô langun ágpampamaké kannun, ágpangumusta dan ákniyu.

¹⁷Na, mga kataladi, banté kó katô mga manubù na ágtikudan ka samuk asta ágpasuwé ka manubù tikud tun ta Manama, su tô ágtinuruán dan ánnà iring katô kabánnalan na taganà igtinurù ákniyu. Purisu liliyi yu sikandan. ¹⁸Dì dan áglumu para katô Áglangngagán ta na si Cristo, asal ágtumanán dan baling tô kandan kakalyag. Su ukit ka madigár ágkagin dan, áglimbung dan katô mga manubù na ándà ikasóddór na madat tô gugtunán dan. ¹⁹Ibantug kód su igbánnal kó gó katô igtinurù ákniyu, asta tuuwa idayawan ákniyu. Asal kakalyag ku na mapandé kó ébô lumumu kó ka madigár, asta lumili kó lumumu ka madat. ²⁰Atin ka liliyan yu tô mga manubù na áglumu ka madat, dì madugé tabangan kó ka Manama na ágbággé ka kasunayan ébô makapanalu kó ki Maibuyan.

Mólà pa ka inalayun kó tabangan katô Áglangngagán ta na si Jesu-Cristo.

²¹Si Timoteo na duma ku na ágtinurù ágpangumusta ákniyu. Ágpangumusta pagsik tô mga kadumaan ku Judio na si Lucio, si Jason, asta si Sosipatro.

²²Sakán si Tercio na igpasulat i Pablo kani, ágpangumusta a ákniyu na igpasakup tun ta Áglangngagán.

²³Ágpangumusta si Gayo ákniyu. Igpóddô a ikandin tun ta balé din na ágpangadapanan katô langun manubù nit lunsud. Ágpangumusta si Erasto na tesorero kani lunsud, asta ágpangumusta si Quarto na sábbad kataladi ta.

²⁴[Mólà pa ka inalayun kó tabangan katô Áglangngagán ta na si Jesu-Cristo. Matuman ni.]

Durungán tô Manama

²⁵Na, durungán ta tô Manama na makapabákkár katô kapamaké yu ukit katô Madigár Gulitán na gulit-ulitán ku tingód ki Jesu-Cristo. Tô gó tô kabánnalan na ándà pasóddóri ka Manama sayyan, ²⁶asal igpasóddór din dán. Igulit-ulit dé tô igsulat ka mga propeta sayyan tingód ki Cristo iring katô igsugù ka Manama na ándà ágtamanán ébô tô langun manubù mánnal kandin ukit katô kapamaké dan.

²⁷Mólà pa ka ukit ka tabang i Jesu-Cristo, ándà ágtamanán ka kadurung ta katô sábbad dád Manama na ikasóddór ka langun! Matuman ni.